


SOMMAIRE

DES MOYENS
DE L'ARCHEVESQVE
DE THOLOSE,

Contre les pretentions de Monsieur
le premier President, & autres
du Parlement.



M. DC. XXIX.

SOMMAIRE

DES MOYENS
DE L'ARCHIEVÊQUE
DE THOLOS

Comme l'archevêque de Tholos
l'archevêque de Narbonne
et l'archevêque de Nîmes

AN DE MDCXII



A V R O Y.



I R E,

Estant troublé par quelques uns des principaux officiers de vostre Parlemēt de Tholose en l'ordre du seruiçe de l'Eglise, en la direction de l'hospital, & aux prerogatiues que j'ay dans l'uniuersité, qui sont trois des principales fonctions de la charge à laquelle il a pleu à vostre Majesté de me promouoir, J'ay recours à vous, S I R E, qui portez si justemēt le tiltre glorieux de protecteur de l'Eglise, que si vous ne l'auiez receu avec la Couronne de vos predecesseurs, vous l'aurez acquis en luy rendant l'usage de ses Autels en plusieurs villes où

A

elle estoit opprimée. Cette mesme Eglise
 implore vostre autorité pour conseruer
 ses Prelats dans la liberté de leurs fun-
 ctions, avec la dignité, & les prééminen-
 ces qui leur sont deuës, & dont ils ont
 joüy de tout temps dans vostre Royaume.
 Ils n'ont pas besoin pour ce sujet de vos
 armes victorieuses. Vne declaration de
 vostre volonté, un oracle de vostre bouche
 les affranchira des empeschemens qu'ils
 reçoient. Les Rois d'Espagne ont profi-
 té soigneusement de semblables occasions
 pour donner sans peril des preuues publi-
 ques de leur pieté. Philippes second alla
 à l'Eglise de Valence pour condamner vne
 pretention de son Viceroy par un juge-
 ment muet, en faisant presenter la paix à
 l'Archeuesque deuant que la receuoir.
 Vostre Majesté qui cherche la gloire dans
 les hazards de la guerre, & dans le tra-
 uail des sieges, ausquels elle employo les
 plus beaux de ses iours pour étendre les
 limites de l'Eglise; parmy les prosperi-

Loppes
 & Iuan
 de Tor-
 res.

teſ que Dieu donne à ſes armes ne perdra pas les occaſions de conſerver ſes prerogatives. Childebert l'un de vos predeceſſeurs, Gregor.
Turon.
lib. 6. c.
11.
SIRE, ayant ſceu que Dinamius Gouverneur de Prouence ſe comportoit mal avec Theodorus Eueſque de Marſeille, enuoya le Duc Gundulphe qui luy fit faire ſermēt d'eſtre fidelle à l'Eueſque. Le feu Roy Henry le grand, de glorieuſe memoire, a reprimé deux diuerſes fois les entrepriſes que deux Preſidents du Parlement de Tholoſe faiſoient contre l'honneur de l'Egliſe, comme il eſt remarqué dans cet eſcrit; Il y en a qui les renouellent, y employans le nom & l'auctorité de voſtre Majeſté, & ne conſiderent pas, que tant de belles actions de voſtre inſigne pieté, & tant d'entrepriſes pour le ſeruice de Dieu, conduittes à un heureux ſuccés par voſtre generoſité, ſont des publics deſadueuz, de tout ce qu'on pourroit attenter ſous voſtre nom contre les prerogatives de l'Egliſe: mais puis qu'ils n'apperçoient pas la deſerence aux officiers de ce-

luy par lequel vous regnez, qu'un chacun
louë & admire en vostre Majesté, qu'il luy
plaise de leur en prononcer ses sentimens,
& declarer ses volontez. Ainsi Dieu benira
ses desseins, & multipliera ses victoires.
C'est le vœu que fait

De vostre Majesté,

Letres-humble, & tres-obeïssant,
& tres-fidelle seruiteur & sujet.


CHARLES ARCH. DE THOLOSE.



SOMMAIRE

Des moyens de l'Archeuesque de Tholose.

*Contre les pretentions de Monsieur le
premier President, & autres du Parle-
ment.*



VANT l'arriuée de
l'Archeuesque de Tho-
lose dans son Diocese,
Messieurs du Parlemēt
resolurent de changer
l'ordre qu'ils auoient
tousiours tenu aux defe-
rrees avec leur Pasteur,
& au lieu qu'ils auoient
accoustumé d'aller en corps de Cour avec les
chapperons & robes noires, les Huissiers mar-
chans deuant jusques à l'entrée de l'Eglise Me-
tropolitaine, là le saluër à son premier aduene-
ment, receuoir de luy la benediction solem-
nelle dans l'Eglise avec tout le peuple, & après
le conduire jusques à son hostel, resolurent d'y
enuoyer le second President, avec vnze Con-

*Le Parlemēt, la cham-
bre des Comptes, la
Cour des Aydes, & la
maison de Ville sont
allees en corps à l'Eg-
lise de Paris, lors que les
Euesques ont fait leur
entree, comme il se fait
dans le Ceremonial de
la chaire des Comptes
de l'an 1598. A Tholo-
se on'en fust de mes-
me, comme on voit par
les registres de la mai-
son de Ville, du 15. Mars
1533. & 7. Iānier 1590.
Et par vn Arrest du
Parlement du 3. Iā-
nier 1590.*

seillers, pour faire ce compliment de leur part.

La maison de Ville qui se portoit avec grande ferueur à le bien accueillir, eust du déplaisir du changement que le Parlement apportoit à l'ordre ancien ; & delibera (puis que le Parlement ne seroit pas en corps) de ne souffrir pas que ses deputez prinsissent aucun aduantage en l'ordre ou seance sur les Capitoulx.

Cette deliberation rapportée à la Cour, causa vne grande émotion, laquelle se termina par vn sage conseil, qui fut, que Messieurs les deputez ne se trouueroient pas à cette ceremonie, mais iroient saluër l'Archeuesque lors qu'il seroit arriué en son logis, ce qui fut fait.

L'Archeuesque neantmoins voulant témoigner à Messieurs du Parlement qu'il se sentoioit obligé de leur accueil, après auoir rendu à Monsieur le premier President la visite qu'il auoit receu de luy, le pria d'agréeer qu'il allast saluër la Cour, & la remercier de la bonne correspondance qu'elle luy auoit promis par ses deputez : & par mesme moyen tenir la place de Conseiller nay que ses predecesseurs y auoient eu. A quoy ledit sieur Presidēt vsa de remise par deux fois ; Et luy dit que le jour de son installation son grand Archidiacre auoit pris place dans l'Eglise en la premiere chaire à main gauche de l'Archiepiscopale, laquelle appartenoit *en pro-*

priété aux Presidents du Parlement ; & que sans la consideration du peuple, duquel il n'auoit pas voulu troubler le contentement en cette action, il l'en eust fait tirer par le collet ; Et adjousta qu'ils pourroient encor auoir quelque contestation pour le droit de presider aux assemblées de l'hostel Dieu, & qu'il estoit à propos de vuidier ces differents auant que l'Archeuesque fust receu au Palais.

Nullius sunt res sacra religiosa, & sancta quod enim diuini iuris est id nullius in bonum est, veluti ad sacra. §. nullius in f. de rer. diuis.

Neantmoins le Parlement ne jugea pas raisonnable de retarder cette reception pour ses interets, & Monsieur le premier President ceda à l'aduis commun, à la charge, que le compliment qui auoit accoustumé d'estre fait par plusieurs des Conseillers de la Cour, aux Archeuesques de Tholose, lors qu'ils venoient au Palais, seroit fait par deux d'entr'eux pour la premiere fois tant seulement : Et que l'Archeuesque ne feroit porter sa croix deuant soy que jusques à la porte de la salle des audiéces, & qu'il feroit serment comme les officiers ordinaires de la Cour, & liroit la profession de foy. Il se relascha à toutes ces nouveautez sur ce qu'on l'asseuroit que ses predecesseurs en auoient fait de mesme, & sous l'esperance qu'il n'y auroit plus de contestation.

Mais après la reception n'ayant peu disposer Monsieur le premier President à aucun accom-

modement sur ses pretentions de la chaire , & de la direction des assemblées de l'hostel Dieu. Et voyant qu'il rejettoit avec aigreur toutes les ouuertures qui luy estoient faites sur ce sujet , il en fit faire les propositions au Parlement , qui jugea fort ciuill l'expedient proposé par l'Archeuesque , d'en escrire de part & d'autre au Roy , & attendre que sa Majesté en ordônast; à quoy ledit sieur President fust plus diligent que l'Archeuesque.

Pendant qu'on attendoit vn ordre sur ces differents , suruindrent les disputes en Theologie du Chapitre general des Iacobins, ausquelles l'Archeuesque ayant esté inuité , & sy estant trouué avec plusieurs des Euesques de la Prouince, ledit sieur premier President y estant suruenu, ne pûst souffrir qu'ils fussent en rang separé de Messieurs de la Cour , & entreprist de leur faire prendre seance après soy par voye de fait , accompagnée de paroles injurieuses; & deux jours après s'ingera de regler d'office, & sans requisition de personne, ny conference avec l'Archeuesque, le rang , habits , & assistance qu'il auroit aux processions. Et après auoir assemblé plusieurs fois les chambres pour ce sujet , il obtint l'adueu de la Cour , la plainte en ayant esté faite au Roy , sa Majesté en a témoigné son déplaisir au Parlement, luy
a man-

a mandé d'enuoyer des deputez, & à l'Archeuesque de se rendre à la Cour, pour estre reglés sur tous leurs differents, qui se reduisent à quatre chefs.

Le premier, est pour la chaire du grand Archidiacre.

Le second, pour le droict de presider aux assemblées de l'Hospital.

Le troisieme, est la plainte de l'injure faite à l'Eglise, aux personnes des Archeuesque & Euesques, dans le Couuent des Iacobins: en suite de laquelle il est soustenu, que l'Archeuesque, & les Euesques qui se trouuent avec luy, doiuent precéder ledit sieur premier President, & autres, tât aux actiôs de l'Vniuersité & Escholles, que aux Processions, Baptesmes, Enterremens, & en toutes autres assemblées publiques & particulieres, hors du Parlement. Et que és Processions l'Archeuesque estât apres le Poisse, doit auoir prés de soy ses officiers & seruiteurs qui luy sont necessaires pour la bienseance de sa dignité.

Le quatrieme, & dernier, est à ce qu'il plaise au Roy faire deffences au Parlement de troubler l'Archeuesque en la faculté de faire porter sa croix deuant soy, jusques à la Chappelle du Palais, & d'exiger de ses succeffeurs aucun serment ny profession de foy, à cause de leur qua-

lité de Conseiller nay au Parlement.

Pour le premier chef : Monsieur le premier President n'est pas receuable à contester aucun siege dans le cœur de l'Eglise Metropolitaine contre les Ecclesiastiques, d'autant qu'il n'y a seance aucune que par leur Indulgence, laquelle ne donne aucune propriété, ny aucun tiltre pour prescrire : puis que la nature des choses de l'Eglise ne le souffre pas. C'est la disposition du Droit Civil, auquel le Droit Canon est conforme en ce poinct, & les Conciles de l'Eglise Gallicane, les Capitulaires de nos Roys, & l'ordonnance faite par le feu Roy Henry le Grand, en l'année 1606. verifiée au Parlement, qui defend à toutes personnes de quelle qualité & conditions qu'elles soient, d'occuper les haults sieges des chœurs des Eglises affectez aux Ecclesiastiques pendant le Service : Suivant ceste ordonnance le Parlement de Paris fit desfences au Presidial de Clermont d'occuper les places des dignitez & Chanoines de l'Eglise Cathedralle, par Arrest de l'année 1611. Et Monsieur Duranty premier President de Tholose, a fort bien preuvé, quel v'sage de l'Eglise a esté tel depuis le temps des Apostres, & que la desfence faite aux personnes laïques de se mesler parmy le Clergé dans le Presbitere, s'entendoit aussi du chœur où se faict la Psalmodie, quand ilest

*Accursius l. 2. C. de sacr.
Ecl. l. 1. Boet. Epi. ad c.
1. ext. de vit. & bon. cler.
Can. sacerdotum de
consecrat. dist. 2.
Concil. Turon. 2. can. 4.
Capitul. 203. feb. 7.*

*Rapporte par M. Servin,
& par Chenu.
Lib. 1. de vit. & Eccl.
c. 17.*

separé : & que ces deux parties de l'Eglise portent mesme nom, & sont comprises sous mesme prohibition.

Cet ordre a esté obserué d'ancienneté en l'Eglise de Tholose : car, il y a dans la Nef vn grád banc affecté à Messieurs du Parlement, comme anciennement à Rome il y en auoit vn pour les Princes, & pour le Sénat, appelé *Senatorium* : qui estoit d'vn costé de la Nef, à l'opposite des sieges des Dames, comme il se peut recueillir du liure intitulé *Ordo Romanus* qui est ancien.

Mais quand Monsieur le Premier President pourroit pretendre quelque siege dás le chœur del'Eglise, ce ne seroit pas celuy qu'il demande, d'autant qu'il est affecté au grand Archidiacre, pour deux considerations.

La premiere est, à cause qu'il a la seconde dignité dans l'Eglise de Tholose : de laquelle, comme de celle de Paris, & autres, le chœur est remply à ses quatre bouts par quatre dignitez ou offices : le Preuost & le Chancelier occupent les deux extrémitez du costé gauche, le Chantre & le grand Archidiacre celles du costé droict. Et ces quatre Dignitez ne doiuent jamais quitter leurs places à aucune personne, de quelque condition qu'elle puisse estre : comme à Paris, ceux qui occupent les quatre bouts du chœur, ne quittent point les leurs aux offices

solemnels, ny mesmes les Archidiacres, qui ont leurs places au fonds du chœur : d'un costé, après le Doyen, & de l'autre après le Chantre : & Monsieur le premier President & autres de la Cour prennent place après eux. A Tholose Messieurs du Parlement n'ont jamais troublé le Preuost en sa place, ny le Chancelier : apres lequel ils ne font pas difficulté de se mettre, mesmes lors qu'ils sont en corps, & qu'ils occupent les deux costez du chœur. Et pour ceste raison le grand Archidiacre ne doit pas quitter sa place, qui est au bout des sieges des Chanoines du costé droict, proche de la chaire Archiepiscopale, principalement lors que l'Archeuesque est en son Siege, soit que la Cour y soit en corps, ou quelques Presidents ou Conseillers en particulier, comme en l'Eglise de Paris le grand Penitencier, qui occupe vne semblable place, ne la quitte jamais, sur tout quand Monsieur l'Archeuesque est en son Siege : Aussi les grands Archidiacres de Tholose, prenans possession de leur Dignité sont tousiours installez en ceste place : comme au moys d'Avril de l'année mil six cens vingt-huict, lors que M. Benoit en prit possession. Et il se trouue vn acte d'installation de l'an mil cinq cens soixante-huict, qui designe fort expressement que le siege cõtentieux est celuy du grand Archidiacre,

cre: & on demeure d'accord de ces installations.

La seconde consideration pour laquelle cette place est affectée au grand Archidiacre, est pour ce que sa dignité l'oblige d'assister l'Archeuesque en toutes ses fonctions plus celebres, & luy couvrir le costé gauche, comme dans le Presbitaire quand il dit la Messe pontificale; & en son siege du chœur quand il dir Vespres, ou qu'il assiste aux offices solempnels, en son synode, & quand il donne les Ordres, & en d'autres actions, auxquelles il doit faire la fonction de celui qui est appellé (*Presbyter assistens*) dans les Rituels. En cette qualité quand les Archeuesques de Tholose sont installez dans leur siege pontifical, le grand Archidiacre est toujours à leur main gauche, comme il y estoit le quatorziesme iour du mois de May de l'année mil six cens vingt-huict, lors que l'Archeuesque prit possession de l'Archeuesché de Tholose. Et a esté ainsi observé de tout temps, comme il se voit, tant par l'acte de l'installation de feu Monsieur d'Orleans Archeuesque de Tholose, de l'an mil cinq cens vingt-deux, qui le porte en termes exprés, comme par le reglement des seances du chœur, fait par ledit sieur d'Orleans Archeuesque, en l'année mil cinq cens trente, par lequel donnant place dans le chœur après les Chanoines, aux Prebandiers, qu'on

D

appelle Hebdomadiers ; L'acte porte que le grand Archidiacre estoit placé entre-eux & l'Archeuesque à l'opposite du Châcelier : Monsieur le premier President reconnoist que deux qui ont esté grands Archidiacres rendent témoignage de cet usage. Et dit qu'on peut auoir deferé en cela à feu Monsieur le Cardinal de Joyeuse , comme Doyen du sacré College , & Legat du saint Siege ; Qui sont des qualitez qu'il n'auoit pas encores en l'année mil six cens trois, lors qu'il partist de Tholose. A ces actes del'Eglise , & au témoignage de deux Archidiacres on peut adjouster celuy des plus anciens de la Cour ; Car Monsieur de Mansencal doyen du Parlement , autant venerable pour sa probité que pour son aage , a reconnu qu'il auoit souuenance d'auoir veu garder cet ordre lors qu'il y auoit des Archeuesques residents , & la assuré à plusieurs personnes , mesmes à Monsieur de Caminade second President, en presence de l'Archeuesque. Aussi ayant esté nommé pour venir vers le Roy avec les autres deputez du Parlement pourtes differents, il s'en est excusé, sa conscience resistant à cette poursuite. Monsieur le President Bertier, député, & plusieurs autres de Messieurs de la Cour ont connoissance de cette verité, qui est confirmée par l'adueu de tous ceux de la ville , qui se souuien-

nent d'auoir veu officier l'Archeuesque, & d'un nombre infiny des plus irreprochables ont donné leur deposition deuant vn Conseiller du Seneschal, qui en a receu vn acte de notoriété, par lequel il est expressement porté, que lors que feu Monsieur le Cardinal de Ioyeuse estoit en sa chaire pontificale, il auoit tousiours son grãd Archidiaque assis dans le premier siege à sa main gauche; mesmes en presence de Messieurs les premiers Presidents de Sainct Iory, & de Verdun, qui prenoient leur seance après luy. C'est le dernier estat de la possession; car depuis Monsieur le Cardinal de Ioyeuse, le siege Archiepiscopal n'a pas esté occupé.

L'ordre de l'Eglise veut que toutes & quantes fois que l'Archeuesque officie à la Messe dans le Presbitere, ou à Vespres dans le chœur, ou qu'il assiste aux offices solempnels, il aye deux Archidiacres à ses deux costez, (qui soient assis ou debout, cōme luy, outre le Maistre des ceremonies, ses Aumosniers, & autres Ecclesiastiques qui sont tousiours debout, comme *Amararius Fortunatus*, & *Honorius Prestre d'Auchun* disent que de ceux qui assistēt l'Euesque, *aliqui sedens, & aliqui stant.*) Ce qui est si exactement gardé dans l'Eglise de Tholose, que le Preuost mesme a deux sieges vuides à ses deux costez, pour y placer deux assistans quand il dit Vesp-

*Lib. 2.^o de offic. Eccles.
c. 10. Hon. Augustod.
in gemma anima lib.
l. c. 4.*

pres, sans que les Capitoulx de la ville, qui prennent leur seance près de luy, ayent jamais apporté aucun empeschement à cet vsage; Et le moindre prebandier de l'Eglise officiant dans la nef a deux comministrans à ses deux costez, desquels celuy de main gauche se treuue assis au dessus du banc que Messieurs du Parlement y occupent, sans qu'ils se soient jamais plaints de cette seance; Que si vn prebendier a cetteliberté, il y a peu d'apparence de troubler l'Archeuesque en cet ordre, qui a esté obserué au vieux & nouveau Testament, & continué dans l'Eglise depuis le commencement du Christianisme jusques à nous. Moyse priant sur la montagne auoit Aaron & Hur à ses deux costez qui luy soustenoient les bras; Iesus-Christ duquel toutes les actions sont nos instructions, est souuent représenté entre deux assistans, en sa transfiguration Moyse & Helie couuroient ses deux costez. Et saint Pierre proposa de luy faire vne station à trois tabernacles, comme sont les chaires Archiepiscopales. La mere des enfans de Zebedée auoit tellement accoustumé de le voir ainsi assisté, qu'elle ne le se pouuoit imaginer dans sa gloire qu'avec deux assistans, & le prioit d'employer ses deux enfans à cet office, l'vn à sa main droite, & l'autre à sa main gauche. Pour mesme raison saint Augustin re-

marque

Exod. 17.

Matt. 17.

Matt. 20.

Lib. 1. de conf. Euang.

marque, que d'ordinaire Iesus-Christ estoit
 peint entre saint Pierre & saint Paul, les Apo-
 stres suivirent cet exemple, qui estoient touf-
 jours accompagnez de deux assistants, comme
 saint Pierre, de saint Clement & de saint
 Anacle. Saint Paul, de Thimotée & de Lynus,
 au rapport de saint Ignace martyr. Et cet or-
 dre est donné aux Euesques en deux endroits
 des constitutions Apostoliques, recueillies sous
 le nom de saint Clement, qui auoit seruy d'as-
 sistant à saint Pierre, où il leur est prescrit d'estre
 tousiours dás l'Eglise entre deux prestres, com-
 me entre leurs disciples, & d'auoir vn Diacre à
 main droite, & l'autre à main gauche; Il a esté
 ainsi obserué dans l'Eglise de Tholose dès son
 commencement; Car Gregoire de Tours nous
 represente saint Saturnin premier Euesque,
 accompagné de deux assistans jusques à sa per-
 secution.

*Epist. 2.**Lib. 1. Hist.*

Quelques anciens Peres de l'Eglise ont re-
 marqué des mysteres en la disposition de cette
 seance. Et d'autant que les Euesques sont ap-
 pellez les Throsnes de Dieu, à cause du saint
 Esprit qui habite en eux, & les prestres sont ses
 Angés: Les vns y ont trouué la representation
 du Propitiatoire accompagné de deux Cheru-
 bins, les autres celle du Throsne esleué dans
 Isaye, avec ses deux Seraphins. Et pour cette

*Clemens.
 Iohann.
 Germanus.*

E

raison, aux Eglises de Grece, en celle de Rome, & en plusieurs d'Espagne les assistans portent chacun vn éventail de plume, qui represente leurs aisles tremblantes de crainte & de respect.

*Matthem Blasphas
dans son Nomocanon.
M. 3.
Zonaras.*

Les Canonistes Grecs ont creu que la chaire Archiepiscopale dans l'Eglise, estoit vn Tribunal de ~~leur~~ Jurisdiction, & que les assistans estoient deux Assesseurs pour ~~leur~~ aider à deliberer sur les occurrences, & y pouruoir. Quelques vns ont creu que ces deux assistans estoient les témoins, appelez *Cellulani* οὐρανιστῆς, que les Euesques doiuent auoir en toutes leurs actiōs.

*In Gemma anima lib.
1. c. 3.*

Honorius prestre d'Aurun, qui escriuoit enuiron l'an mil cent vingt, dit que l'Euesque entre deux assistans, represente Iesus-Christ entre le vieux & le nouueau Testament, entre les Prophetes & les Apostres; Bref, le Clergé estant vn corps, duquel les vns sont les pieds, les autres les bras; les Archidiaques qui en sont les yeux, doiuent estre tousiours aux deux costés du chef qui est l'Archeuesque. Et pour cette raison deux Archidiaques luy rendent cette assistance aux offices & autres fonctions.

*Paul, 1. Corins. 21.
D. Hieron. Ep. ad Nepotianum. alius in Ecclesia oculus est, alius lingua, alius manus, per aurum, venter. Eccl.
Isid. Pelus. lib. 1. ep. 29.
ὁ ἀρχidiaκὸς ὁ ὀφθαλμὸς τοῦ ἐπισκόπου
ὁ ἀρχidiaκὸς ὁ χεὶρ τοῦ ἐπισκόπου.*

Que si cette ceremonie est venerable pour son antiquité, & pour les mysteres qu'elle represente, elle est aussi considerable pour la necessité qui est telle, que l'Archeuesque ne pourroit jamais faire l'office à Vespres dans son Egli-

se fil estoit priué de la place contentieuse ; Car il les doit dire dans le chœur, & ses assistans luy doiuent tenir le gremial, l'un d'un costé, l'autre de l'autre; Ils luy doiuent leuer le pluuiail quand il marche, ou qu'il fait les encensements & autres ceremonies, l'un luy doit leuer la mitre, l'autre tenir le liure, Et font quasi toutes les mesmes fonctions quand l'Archeuesque n'officie pas, mais assiste aux offices solempnels, soit qu'il y soit avec la mitre & le pluuiail, ou avec la chappe pontificale. Car lors il ne laisse pas de faire plusieurs belles ceremonies, comme les benedictions de l'encens, de l'eau, de celui qui dit l'Euangile, la benediction solempnelle, les Cercles, & plusieurs autres, quoy qu'en vucillent dire quelques uns, qui n'ont point encore veu d'Archeuesque à Tholose dans ses fonctions, & qui n'ont pas la cognoissance de ces matieres.

Ces Archidiacres sont encore necessaires au prés de l'Archeuesque, pour la dignité de son caractere; car comme il ne seroit pas raisonnable de priuer Monsieur le premier President du nombre d'Huissiers qui marchent deuant luy dans le Palais pour l'ornement de sa dignité, il est encore moins iuste de diminuer l'apparat qui doit estre apporté au service de Dieu, lequel est d'autant plus necessaire maintenant

*Episcopi sapientibus &
insipientibus debitorum
cum sint, carnalis po-
puli deuotionem, quia
spiritualibus non pos-
sunt, corporalibus exci-
tant ornamentum. Bern*

que le peuple qui est peu touché par les choses spirituelles est encores excité par l'ornement extérieur, que les Euesques sôt obligez de rechercher comme saint Bernard l'enseigne; Bref l'Eglise, de laquelle l'ordre nous est venerable, la ainsi pratiqué depuis son commencement & en toute son estendue, le ceremonial du Pape, celuy des Cardinaux, & celuy des Archeuesques & Euesques le prescriuent; il a esté inuiolablement obserué à Tholose, où il y a vn officier dans le chœur, qui s'appelle Maître des ceremonies, pour auoir soing que le ceremonial soit exactement suiuy, & la chaire Archiepiscopale est dressée à cest vsage. Après cela renuerfer vn si bel ordre, & diminuer le culte de Dieu, seroit faire peu de compte de la Religion.

La structure des chaires, de laquelle on veut tirer quelque aduantage, fortifie grandement le droit de l'Archeuesque.

Premierement pour ce qu'il y en a vne à main droite de l'Archeepiscopale, qui est pour vn des Archidiaques assistans, par consequent il faut qu'il y en aye vne autre à main gauche, d'autant que le siege de l'Archeuesque ne peut estre le plus honorable qu'estant au milieu de deux, autrement son assistant de main droite estant premier en ordre, le precederoit.

Secondement la chaire contentieuse est en-
tiere-

tièrement semblable à celle de main droite en grandeur, profondeur, couronnement & en toutes ses dimensions, & n'y a qu'une difference, qui est, qu'au deuant de celle de main gauche il y a vn accoudoir, & n'y en a point au deuant de celle de main droite; la raison est, que lors que l'Archeuesque est en sa chaire, il faut que tous les officiers ayent l'accez libre à luy, pour les encensemens & benedictions, à quoy l'accoudoir apporteroit obstacle, s'il y en auoit du costé droit, qui est le costé de l'Autel. Mais celuy qui est deuant la chaire contentieuse, ne fait aucun empeschement, pource que personne ne vient vers l'Archeuesque du costé gauche; il faut aussi qu'il y aye vn accoudoir deuant le siege du grand Archidiacre, pour le rendre semblable à ceux des autres trois dignitez qui occupent les extremités du chœur.

Quant à la menuiserie qui semble estre en la chaire de main droite plus qu'en celle de main gauche, c'est vn enjoluiement qui fait la closture du chœur semblable à la closture des trois autres extremités, avec lesquelles il a sa simetrie & proportion, & non avec la chaire du grand Archidiacre.

Mais cette difference ne sert de rien à Monsieur le premier President, car il demeure d'accord que les chaires du chœur qui furent bru-

flées en l'année mil six cens neuf, ont esté refaites en la mesme forme qu'elles estoient auparavant, & les anciennes auoient esté construites plusieurs siècles auant qu'il y eust ~~du~~ Parlement à Tholose. Si bien qu'en les faisant on n'auoit pas. pensé à luy acquerir aucun droit: Que si on eust destiné ce siege pour les Presidents de la Cour, on y eust fait vne issue proche pour aller à l'offrande; car en la forme qu'il est, vn President l'occupant, seroit obligé de chercher vne issue bien auant dans le chœur, pour aller à l'offrande, autrement il n'y sçauroit aller sans heurter l'Archeuesque, ou marcher sur luy si il estoit en son siege, ce qui ne seroit pas bien-seant.

L'on objecte que M^{rs}ieur le premier President, ou autre de la Cour, represente le Roy patron des Eglises Cathedrales, auquel les premieres seances sont deuës. Le Presidial de Clermont, lors qu'il occupa les sieges des Chanoines dans l'Eglise Cathedrale, se seruoit de ce mesme fondement, quoy que avec moins de droit, aussi ne laissa-il pas d'estre deboutté de sa pretention par arrest du Parlement de Paris. Mais d'autant que cette objection se fait sur tous les points contestez, il y sera respondu vne fois pour toutes.

Que Messieurs du parlement estans en

corps dans leur Tribunal, & en l'administratiō de la justice;representent le Roy, aussi leurs ar-
rests portent son nom, pour marque de leur
autorité; comme les Decrets de l'Eglise por-
tent la marque du saint Esprit qui les inspire
aux Prelats. Mais ceste representation ne leur
donne pas rang ou preeminence hors des prin-
cipales fonctions de leurs charges. C'est pour-
quoy vn Prince du sang cede à vn premier Pre-
sident dans le Parlement, & le precede par tout
ailleurs, & de mesmes plusieurs autres. Que si
les Officiers qui representent l'autorité souue-
raine du Roy, prenoient la seance qui est deuë
au Roy, il ne faudroit pas qu'ils cedassent à per-
sonne, non pas mesmes aux enfans de France.
Mais tant s'en faut que ceste representatiō leur
donne la seance qui est deuë au Roy, que dans
le Palais mesme ils laissent sa place vuide sans
y mettre ny leur mortier ny leurs placets. Et
parmy les Perles c'estoit crime de leze majesté
d'occuper le siege du Roy.

*Visum est spiritui san-
cto & nobis Act. c. 15.
n. 28.*

*Spartian. in Seneca in
Sella Imperatoria se-
mere à ministro posita
sedet, Ignarus quod non
lisceret.
Val. Max.*

Mais les Officiers hors de leurs sieges & de
leurs fonctions, soit en particulier, soit en com-
pagnie, ne representent pas le Roy: & ne peu-
uent pas donner des jugemens qui portent son
nom, autrement le Roy se trouueroit represen-
té à mesme temps en beaucoup d'endroits d'v-
ne ville par plusieurs personnes differentes, en

*Quidquid in excelsis
sacrificiis positum est, hu-
mili & trita consuetu-
tudinē, quo sit venera-
bilis, vacuum esse con-
venit. Val. Max.*

*M. Tullius Cicero ep. 13.
lib. 5. ad fam. lib.*

forte qu'il y auroit autant de representations du Roy qu'il y auroit d'Officiers, qui ne seroient pastoujours avec la decence & l'apparat qui doit accôpagner la representation d'un grand Roy; laquelle pour estre conseruée en veneration parmy le peuple, ne doit pas estre exposée en tous lieux, à toute rencontre, ny par tant de diuerfes personnes. Alexandre le Grand deffendit à tous les peintres de le pourtraire, n'en laissant la liberté qu'à Appelés, tant il auoit peur, que sa representation estant rendue trop commune par la multitude de ses pourtraicts, le peuple en prît des conceptions basses, & perdit l'opinion de sa diuinité, qu'il vouloit imprimer dans les esprits des hommes.

Sur tout, le Roy ne peut estre representé dans l'Eglise, ny aux droicts honorifiques, pour deux raisons:

La premiere est, par ce que ceste representation, qui reside au corps, n'est jamais sans authorité. Or dās l'Eglise Messieurs du Parlemēt ne peuuent pas exercer leur authorité: Car les Canons des Conciles leur deffendent à peine d'excommunication des'y assembler pour deliberer ou juger. Et ces Cōciles ont esté tenus en Frâce, & publiez de l'authorité de nos Roys. Celuy du Concile general de Lyon tenu sous Gregoire X. où il y auoit plus de mille Peres, est formel pour

*Concil. Turon. sub Caro-
lo Magno. sancti Me-
dardi suefison. Arelaren.
Capitular. addit. 3. c. 60.*

*cap. decret. de immunit.
Eccl. in 6. cessent in Ec-
clesiis societatum qua-*

pour les Parlements de France, comme le sieur *humiliter Concilia, & publica Parla-
mentis.*
 Duranti premier President de Tholose le re- *Lib. 1. c. 20.*
 cognoist dans son liure des Ceremonies. Ce
 n'est pas que leur autorité se perde dans l'E-
 glise, mais elle y est suspenduë; & côme disoit
 le Philosophe Taurus en vn autre sujet, *Inter- Gellius lib. 2. c. 2.*
quiescit paululum, & conuiet. Ils y abbattent
 leurs enseignes comme vne puissance moindre
 en presence d'une plus grande: & y sont consi-
 derez non par leur Magistrature ou par leur au-
 thorité, mais par leur foy comme Chrestiens, *Paul. ad Galat.*
 enfans de l'Eglise, & brebis du berail: *Tan-*
quam fideles laici. Ceste police a esté gardée
 dés le commencement du Christianisme: Car
 nous lisons que l'Empereur Iulian lequel pour *Herm. Sozom. lib. 3. c. 2.
lib. 5. c. 2.*
 auoir esté lecteur en l'Eglise, sçauoit tresbien
 ses coustumes, estant deuenu deferteur, & vou-
 lant transferer au Paganisme le culte & la ve-
 neration qui estoit réduit aux Eglises des Chre-
 stiens, exhortoit Arfacius Pontife payen, d'ob- *Herm. Sozom. lib. 5. c. 13*
 seruer plusieurs beaux reglements qui estoient
 pratiquez par les Euesques, & deles imiter en
 ceste discipline, *Que quand les Presidents des*
Prouinces entreroient dans les Temples, leurs Ap-
pariteurs s'arrestassent à l'entrée pour les suivre, si
bon leur sembloit, d'autant, disoit-il, qu'ils deue-
noient particuliers sur le seuil de la porte, & que
la Loy de Dieu y auoit estably vne autre puissan-

ἀπειθήσαντες τῷ νόμῳ τοῦ
ἐξουσιῶντος ἡμῶν, καὶ κτη-
νῶν.

lib. 6. c. 7. ἡμεῖς μετα-
λάβωμεν τὴν χάριν τοῦ
Θεοῦ.

Orat. de non tradendū
basilicu.

Orat. 17. αἰεὶ τῆς πα-
τριστείας Ναζιανζῆς ἀ-
γαθότητες καὶ τὴν ἀρχι-
επισκοπικὴν ἐξουσίαν. οἱ δ' ἐπὶ
αὐτῇ αὐτῇ τῆς ἡμετέρας
πατρίας, τῆς ἡμετέρας ἐκ-
κλησίας, τῆς ἡμετέρας
ἐκκλησίας, τῆς ἡμετέρας
ἐκκλησίας.

Polycarpe disoit
qu'il auoit appris de
rendre aux Magi-
strats establis de
Dieu, πρὸς τὴν μα-

ce; Que ceux qui obeyssioient à cest ordre estoient
vrayement pieux, & ceux qui y resistoiēt, estoient
ambitieux, vains, & presomptueux : ce sont ses
termes. Les Empereurs mesmes n'ont pas
pretendu d'auoir autre rang dans l'Eglise que
comme fideles & laïques. L'Empereur Va-
lentinian le recognoist de soy dans Sozomene.
Et saint Ambroise luy dit, qu'il n'y auoit rien
de plus honorable à un Empereur, que d'estre
appellé fils de l'Eglise. Saint Gregoire le
Theologien dit hautement aux Gouverneur
& Officiers de Nazianze, qu'ils estoient brebis
de son troupeau, & que la Loy de Dieu les auoit
soubmis à son tribunal.

Les Magistrats sont confiderez, ou cōme
hommes politiques ou cōme Chrestiens. Cō-
me hommes politiques ils possèdent les digni-
tez seculieres; Comme Chrestiens ils sont bre-
bis & enfans de l'Eglise, y ont seance, & parti-
cipent aux sacrez misteres de Iesus-Christ, qui
leur sont dispensez par les Prestres. Partant on
ne doit pas s'offencer si l'Archeuesque a dit, que
les Magistrats ne sont confiderez dans l'Eglise
que comme Chrestiens, puis que c'est la doctri-
ne des Peres, & qu'ils ne representent pas le
Roy comme Chrestiens, mais comme hom-
mes politiques & Officiers : ce n'est pas que
l'Eglise ne les discerne pour leur rendre les hō-

neurs qui ne troublent pas l'ordre du seruice ou de la discipline: C'est l'Eglise qui enseigne d'obeir aux Magistrats non seulement pour la crainte des peines, mais encores pour la descharge de la conscience.

βλαπτοῦν ὁμασί;
Enscb.

Paul. ad Rom.
Pet. ap. 2.

La seconde raison pour laquelle le Roy ne peut estre representé aux Eglises en ses droicts honorifiques est, parce qu'il a ces prerogatiues à cause de son sacre, qui le separe des personnes laiques, & luy donne quelque espece de caractere Ecclesiastique, en vertu duquel il guerit les malades, fait des miracles: & a des preéminences dans l'Eglise qu'il n'auroit pas s'il n'auoit l'onction. Et de fait saint Ambroise assigna sa place dás l'Eglise à l'Empereur Theodose apres les Ecclesiastiques deuant les laiques, disant que *la pourpre qui le faisoit Empereur ne le faisoit pas Prestre*, pource qu'il n'estoit pas sacré. Mais lors que les Empereurs commencerent à receuoir l'onction sacrée, ils eurent aussi entrée dans le presbytere de l'Eglise, côme remarque Balsamon canoniste Grec, qui fait veoir que le sacre donne la seance parmy les Prestres. Or il est certain que les prerogatiues qui dependent du sacre, comme celles qui dependent de l'ordre, ne se peuuent commettre, ny transferer à ceux qui ne sont pas sacrez, & qui n'ont pas l'ordre; d'où il s'ensuit

Herm. Sa Rom. l. 7. c. 24.
Theodoret l. 5. c. 17.

ad can. 69. Synodi in
Trullo.

c. pen. ext. de consue.
Ecccl. Vel Altar.

que le Roy ne peut pas estre representé en la seance & droicts honorifiques qu'il a aux Eglises, non plus qu'en la grace qu'il a, de guerir les malades. Aussi est-il vray qu'il ne va pas à l'Eglise par representation, il sert Dieu en personne, chacun y va pour soy, & pour faire son salut, que s'il y auoit lieu de représenter le Roy à l'Eglise, ce seroit par vne grande pieté, en deferant aux Ecclesiastiques, deuant lesquels le Roy fléchît le genoüil, & rend compte de ses fautes, & en augmentant le culte & la dignité du seruiçe de Dieu, non pas en le retranchant ou l'empeschant.

*Carolus Magnus in capite.
Venant. fortunat. in
sa sancti Martini.*

Mais quand on accorderoit, que les Magistrats representent le Roy à l'Eglise, & chacun en son particulier, cette concession ne leur donneroît pas le droict de faire quitter les sieges de leur fonction aux Ecclesiastiques, & d'arracher par maniere de dire, du Temple du Dieu viuât, ses Images & ses representations, pour substituer en leur place celles du Roy, ce que sa pieté ne souffre pas : car les Ecclesiastiques representent le Roy des Roys chacun en son ministere, Dieu prend part en leurs honneurs & mespris, les tient comme ses Anges, par lesquels il fait sçauoir ses volonteés aux hommes, Qu'ils escoute, escoute Dieu, Ce qu'ils lient en terre, est lié au Ciel. Ils tiennent lieu de Peres & de Pasteurs, ils

*Eyp. sacerdos in Ecclesia
iudex Vice-Christi.*

Malach. 2.

ils benissent, ils sanctifient, ont le regime & les clefs de l'Eglise; & pour comble d'honneur & de dignité, Dieu leur fait cette grace de s'incarner tous les iours entre leurs mains; les Lâiques ont besoin d'estre liez ou desliez, regis & repeus comme brebis, benis & sanctifiez, sont introduits dans l'Eglise & faits enfans de Dieu par le ministere des Ecclesiastiques, desquels partant ils doiuent recognoistre la superiorité aux actions de religion. Sainct Chrifostome disoit à son Diacre, *Si un Duc, si un Consul, ou l'Empereur mesme se presente indignement, arreste le & le reprime, car tu as vne puissance plus grande que la sienne.* Il ne faut donc pas trouuer mauvais qu'un Archidiacre dans l'Eglise, & en l'exercice de sa charge, precede un Magistrat, puis que tout le corps des Ecclesiastiques l'y doit preceder, & que le moindre enfant de chœur va deuant luy à l'offrande.

Mais encore la seance du grand Archidiacre, lors qu'il assiste l'Archeuesque, ne porte pas vne consequence de preface, non plus que quand le Pape est aux offices publics & solempnels, où ayant à ses costez deux Cardinaux Diacres, l'un se trouue en ordre deuant le premier Cardinal Prestre, sur lequel il ne pretend aucun aduantage pour cela, & luy cede ailleurs en toutes seances & honneurs, de mesme que le Parlement

H

*Concil. Matiscon. 2. sub
Pelagio 2. anno 588.
præcipit secularibus ut
si obuium quempiam
clericorum honorarium
in itinere habuerint,
usque ad inferiorē gra-
dum honoru Generan-
ter, sicut condect chris-
tianum, illi colla sub-
dant, per cuius officia
et obsequia fidelissima,
christianitati in sua pro-
meruerunt.
Homil. 83. in Matth.*

*Vn haut Iusticier, Sei-
gneur du territoire, n'a
seance dans l'Eglise,
qu'après les gens d'E-
glise.
Nec confusus honori, co-
leſtibus ordine sedes
prima datur, tractum
proceres tenere secun-
dum.*

marchant en corps, les deux Huissiers qui vont derriere & qui ferment le corps de la Cour, precedent les Thresoriers generaux de France, auxquels ils cederoient sans difficulté en toutes autres rencontres.

*Val. Max. lib. 2. c. 11.
omnia post religionem
ponenda semper nostra
ciuitas duxit, etiam
in quibus summa ma-
iestas decem conspici
voluit, quæ propter non
dubitauerunt sacrum im-
peria seruire, ita se hu-
manarum rerum futu-
ra regimen existiman-
tia, si diuina potentia
bene, & cõstanter susci-
peret famulata.*

Romela payenne pourroit fournir des enseignemens de pieté sur ce subject, qui vouloit que tout cedast à la religion, mesmes ce en quoy elle mettoit le plus grand esclat de sa Majesté, elle ne faisoit point de difficulté d'assubjectir son auctorité aux choses sacrées, croyant qu'elle gouverneroit d'autant plus facilement le monde, qu'elle s'assubjectiroit à ce qui estoit de la religion.

Pour tirer en consequence, comme on veut faire, ce qui se passa, touchant le siege Archiepiscopal de l'Eglise d'Aix, en l'année mil six cens vingt trois, il faudroit rapporter les particularitez & les circonstances du lieu, des personnes, & des coustumes, & les preuues en forme authentique, ce qu'on ne fait pas, car la moindre diuersité du faict, rend le droit different comme vn zero, plus ou moins, augmente ou diminue la valeur des nombres, & de fait, on voit par la copie d'un Arrest du Conseil qu'on employe, qu'aux contestations d'Aix, il ne s'agissoit pas de la place de l'Archidiacre, de laquelle il n'y est faict aucune mention, au contraire il estoit alle-

gué que Monsieur le premier President de Pro-
uence, auoit accoustumé de s'asseoir proche de
la chaire Archiepiscopale, on alleguoit vne cou-
stume, & non pas vn droict; la question estoit,
si vn coadjuteur qui n'auoit seance n'y pouuoir
quelconque dans l'Eglise, du viuant de l'Arche-
uesque, auoit peu changer la forme des sieges,
le Conseil iugea fort bien que non, & ordonna
qu'ils seroiēt remis en l'estat auquel ils estoient
d'ancieneté, & adjousta (par forme d'accom-
modement) que les deux assistans pourroient
prendre leurs places à la main droicte de l'Ar-
cheuesque, dont il n'estoit poinct parlé dans la
contestation; qui fait voir, comme il est certain
d'ailleurs, que la cause ne fust pas instruite sur
ce poinct là; & que ledit coadjuteur qui n'estoit
pas partie legitime, consentir à cet accommo-
dement, n'en iugeant pas, peut estre, l'importan-
ce, & excedant son pouuoir.

En cest affaire, la question est, si la place con-
tentieuse appartient à Monsieur le premier Pre-
sident, ou au grand Archidiacre: on preuue par
actes & par raison, qu'elle appartient à l'Archi-
diacre.

L'Arrest est donné sur vne coustume parti-
culiere, alleguée, & non contredite, au lieu qu'à
Tholose on a tousiours suiuy le droict com-
mun, & l'ordre vniuersel porté par les ceremo-

*Greg. Magn. epist. ad
Leandrum.*

niaux; l'Eglise vniuerselle tolere bien des coustumes particulieres en quelques Eglises: mais on ne regle iamais le general par le particulier, & de fait il n'y a pas vne Eglise en toute la France, qui se soit reglée par celle d'Aix, & celle de Tholose qui est des plus augustes, ne quitera pas l'ordre general qu'elle a tousiours suiuy pour emprunter l'usage esloigné & particulier del'Eglise d'Aix, lequel deueroit estre plustost reformé par celuy de Tolose.

Intuenda sunt consuetudines Regionum, & à Vicinis exempla sumenda. Aggen. Vrbiu. Pipian. lib. 45. ad Sabinnum. Id sequamur quod in regione in qua astitit, frequentatur.

Qués'il y auoit du doute, & qu'il falut le iuger par la coustume des autres Eglises, il faudroit recourir aux voisines, comme sont celles de Bordeaux, Castres & Beziers, & plusieurs autres, esquelles l'Archeuesque & les Euesques ont tousiours eu leurs deux Archidiacres assis à leurs deux costez, dans les sieges stables qui y sont, sans que le Parlement de Bordeaux, ou les Presidents, qui ont esté aux chambres de l'Edict, à Castres & à Beziers, y ayent iamais apporté aucun empeschement.

Argumento 6. Vlt. Inst. de satisfact. cum necesse sit omnes promissiones caput omnium nostrarum ciuitatum, id est, hanc regiam Urbem, eiusque obseruationem sequi. Tertull. de praescr. aduersus haeres. c. 36. percur-re ecclesias Apostolicas, apud quas ipsa adhuc Cathedra Apostolorum

Et si l'exemple des Eglises voisines ne nous pouuoit regler, il faudroit auoir recours à l'Eglise de Rome, qui est la matrice de laquelle, comme nous auons tiré nostre doctrine, aussi en auons nous pris nos ceremonies, & les auons reformé à son usage, de temps en temps, comme sous S. Gregoire le grand, & du depuis par
le

le soing de nos Rois, Pepin, Charlemagne, & Louis le Debonnaire.

*suis locis presidentur.
Et c. Habes Romanum
de nobis quoque au-
ditur et presso est.
Chronicon Engelsweise
Vualfridus, Strabo, Si-
gebertus, Hilduinus.*

Si l'Arrest donné pour l'Eglise d'Aix faisoit vne regle generale pour toutes celles de France, il faudroit changer tous les Ceremoniaux des Euesques, qui ne pourroient plus estre suivis, à cause del'obstacle perpetuel qu'ils trouueroient en cet Arrest. Il faudroit que les Archeuesques fissent l'office, & assistassent à l'Eglise seuls, comme des simples Prestres, plustost que d'auoir leurs deux assistans à leur main droite, avec vne grande indecence, & voir que l'un tournast le dos à l'autel, qu'il passast & repassast à toutes occasions deuant l'Archeuesque pour prendre sa mitre, ou leuer son pluuiail, & faire toutes les autres ceremonies pour lesquelles il l'assiste. Il faudroit rejeter l'usage du gremial, qui a esté dés long temps dans l'Eglise de Tholose, comme il se voit par l'acte de l'installation de feu Monsieur le Cardinal de Ioyeuse, de l'an 1590. qui porte que deux assistans, tenoient le gremial deuant luy; & se pratique encores conformément au Ceremonial, & à l'ancien usage de l'Eglise: Car les assistans estans tous deux d'un costé, ne le scauroient tenir au deuant del'Archeuesque. Les exemples, les preceptes, & les misteres pour lesquels la seance des Euesques entre deux assistans, a esté prati-

*Monsieur le Masuyer
auant qu'estre premier
President, a sugé qu'il
n'est licite d'entreprendre
place ou banc inco-
modat l'office d'un Cu-
ré, ou le public, par sen-
tence arbitrale du pre-
mier Septembre 1604.
entre les sieurs de la
Comtardiere, & de
Marconny en Poitou*

*Codice l'appelle om-
vénor. Balsamum dit
qu'il represente le linge
que: Iesui-Christ auoit
deuant soy, lors qu'il
lauoit les pieds de ses
Apostres.*

quée en l'Eglise, seroient inutiles: Car il n'y en a point qui puisse conuenir, si les assistans sont tous deux d'un costé.

Il est encores à considerer que dans l'Eglise d'Aix, la chaire Archiepiscopale s'estend au delà de la longueur que les sieges d'un costé, ont, a proportion de ceux qui sont à l'opposite, en sorte qu'elle est comme hors du chœur, & l'Archeuesque n'a pas la collation des prebendes & dignitez, le Chapitre se dit exempt, & pretend que l'Archeuesque ne peut pas ordonner des sieges du chœur. Au lieu que le siege de l'Archeuesque de Tholose, & ceux de ses assistans, sont entierement dans le chœur, & le finissent du costé droit, à mesme longueur & proportion que ceux du costé gauche. L'Archeuesque de tout temps y a ordonné des seances, comme il se voit par vn reglement fait par feu Monsieur d'Orleans Archeuesque, en l'année mil cinq cés trente. Et par ce que l'Archeuesque pouruoyant aux dignitez, Chanoines, & Prebendes de l'Eglise, assigne leur place dans le chœur, comme en estant le vray & naturel dispensateur, suiuant l'usage ancien, & moderne de l'Eglise, tant s'en faut qu'on luy en puisse contester aucune.

Cet usage se voit par les Constitutions, recueillies sous le nom de S. Clement. & par Sordane, Theodoret, saint Ambroise, & autres.

On objecte vne deliberation du Parlement en datte du troisieme Iuin de l'année mil cinq cens huiçtante six, par laquelle il est porté, que

le Chapitre de Tholose proposoit à la Cour, d'agréer que, lors qu'elle seroit en corps, & robes rouges, dans le chœur de l'Eglise; trois Archidiacres ou Chanoines fussent placez en leurs sieges de chaque costé au milieu du chœur; & que Monsieur Duranty premier President l'auoit refusé; Et après la Cour l'accorda, à la charge, que lesdits trois Archidiacres ou Chanoines se mettroient après tous les Conseillers; d'où l'on veut conclurre, que le grand Archidiacre ne doit pas estre placé à la main gauche de l'Archeuesque, deuant aucun de messieurs de la Cour.

Cette deliberation fut faite sans ouïr le Procureur general, ny aucune partie legitime: Car il eust fallu en cōferer avec l'Archeuesque, qui eust fait voir, que tout droit diuin & humain y resistoit, cōme il a esté monstré, mesmes par ce qu'en a escrit Monsieur le premier President Duranty, lequel on dit estre l'auteur de cette deliberation, & duquel on ne doit pas presumer, que sa croyance & ses jugemens fussent contraires à ses escrits; aussi cette deliberation n'a jamais esté executée du viuant dudit sieur President, qui ne suruesquit que deux ou trois ans, ~~ne~~ depuis, & ne l'est pas encores à present.

Mais pour ce qu'elle sert pour monstrer l'usage de l'Eglise de Tholose, elle sera receuë

pour en tirer aduantage sans consequence.

Il est à remarquer, que dans l'Eglise de Tholose, il y a le Preuost, le grand Archidiacre, & le Chancelier, & quatre Archidiacres, vn Chantre, & vingt-quatre Chanoines ; & que dans la deliberation du Parlement, il n'est pas parlé du Preuost, ny du Chancelier, parce qu'ils occupent les deux extrémitez du costé gauche du chœur ; & que le Parlement n'a jamais empêché leur seance. Il n'est aussi parlé que de trois Archidiacres, de quatre qu'il y en a, pour ce que l'un d'iceux, & le grand Archidiacre estoient aux deux costez de l'Archeuesque, pour l'assister ; & le Parlement ne pretendoit pas d'apporter aucune diminution à l'apparat du seruice diuin, ny à la dignité Archiepiscopale. Ainsi cette piece confirme plustost le droit de l'Archeuesque en ce point, qu'elle ne l'affoiblist.

Il conuient aussi noter, que cette deliberation ne parle, que quand le Parlement est en corps, & robes rouges, ce qui n'arriue que deux ou trois fois l'année ; Et la contestation est tant pour les jours que le Parlement n'est pas en l'Eglise en corps, comme quand il y est.

On met en auant que l'Archeuesque offre de reculer sa chaire, à fin d'en faire vne pour le grand Archidiacre, entre celle qui est contestée & la sienne. Mais tous Messieurs du Parlement
sçauent

ſçauent, que iamais l'Archeueſque n'a faiſt ceſt offre, & ne le peut faire, pour pluſieurs raiſons.

LA PREMIERE eſt, pource que le ſiege qui eſt à main droicte del' Archiepiſcopal, abou- tiſt proche d'vne porte du chœur, contre laquel- le il y a vn grand Epitaphe de marbre, & au der- riere, la representation en boſſe du feu ſieur Preſident del'Eſtang; & que pour gaigner la place d'vn ſiege entier, en reculant celuy de l'Archeueſque, il faudroit couvrir l'Epitaphe, & vne partie de la porte, qui eſt neceſſaire à l'vſage du chœur.

SECONDEMENT, ce ſeroit gafter la ſim- metrie du plus beau chœur d'Egliſe qui ſoit en France, le faiſant plus long d'un coſté que de l'autre.

EN TROISIESME LIEV, ſi on reculoit le ſiege del' Archeueſque, on le metroit hors du chœur, qui ſeroit vne marque d'exemption pour le chapitre.

can. lumineſe 12. q. 2. c. 10. ſi Papa de pri- uileg. in 6.

Le proceſſ. du chapitre de Chalons qui ſe voit dans les anciens Regi- ſtres du Parlement de Paris en faiſt ſoy.


Bref, l'Archeueſque deſſere trop à l'ordre re- ceu dans l'Egliſe, & ſçait qu'il ny faut iamais ap- porter aucune innouation ou changement, ce qui a eſté ſi ſouuent dit par les anciens, qu'ils en ont faiſt vn prouerbe qui eſt fort commun dás les eſcrits des Peres de l'Egliſe: Que ſi ceſte li- cence de changer auoit lieu, chaque perſonne d'au- torité voudroit changer l'ordre des ſieges ſe-

an. 1170. xlviii.

Ion son imagination, & arriueroit enfin qu'il faudroit que l'Eglise cedast la place au Capitole: qui est vne des plus grandes desolations qui luy puisse arriuer au dire de S. Cyprian.

*Quid superest nisi
Ecclēsia capitolio ce-
dat.*

Ce qu'on propose que le grand Archidiacre prenne sa place sur le marchepied de la chaire de l'Archeuesque avec vn siege portatif, n'est ne possible, ne raisonnable, d'autant qu'il n'y a pas place sur le marchepied pour mettre vn siege portatif à main gauche de l'Archeuesque, qu'il ne soit au deuant de ses genoulx, & qu'il n'empesche entierement l'accez que les autres officians doiuent auoir à luy, pour l'ordre des ceremonies.

Aussi seroit  fort indecent qu'un simple Archidiacre qui est à la main droicte eust vn siege stable au niueau de celuy de l'Archeuesque, & que le grand Archidiacre qui a vne dignité plus eminente, eust vn siege portatif, & fust à ses pieds. Les sieges de l'Eglise sont faits pour ceux qui seruent à l'Eglise, & chaque dignité à sa place certaine & fixe, sans qu'il faille vser de siege portatif pour vn vsage ordinaire. Et bien que quand l'Archeuesque officie à la Messe dans le Presbytere, les sieges des assistans soient portatifs comme le sien, il ne s'ensuit pas que quand il dit Vespres, ou qu'il assiste aux offices solempnels, pour lesquels son siege est esleué, fixe & sta-

ble, & ceux de ses assistans semblables, qu'ils les doiuent quitter, & en prédre des portatifs pour donner seance à vn de Messieurs de la Cour, qui peut estre ny viendra pas, & qui seroit aussi commodement au siege suiuant. Si les prieres pour estre faictes plus loing de l'Autel, estoient moins agreables à Dieu, ce desir d'en approcher seroit loüable, mais Iesus-Christ nous a en-
Luc. 18. seigné le contraire.

On allegue qu'il n'y doit point auoir de milieu, entre l'Archeuesque & le Parlement; qui represente l'auctorité Royale, & c'est vne maxime de laquelle tant de grands personages qui ont esté au Parlement de Tholose, & en tous ceux de France, ne s'estoient pas aduisez; car aucun n'a eu encores de semblables pretentions, si ce n'est peut estre à Aix, d'où l'on ne peut pas faire vne maxime où regle generale. Pour dónner plus de couleur à ceste proposition il n'eust pas fallu prendre l'Archeuesque seul pour l'approcher du Parlement en corps, il eust fallu dire qu'entre l'Eglise ou le Clergé (qui ne faict qu'un corps avec l'Archeuesque) & le Parlement, il n'y doit auoir personne, & on eust passé ceste maxime, qui n'eust pas separé l'Archeuesque de son clergé dans son Eglise, autrement le considerant seul, il y aura vne grande distance entre luy & la Cour, lors qu'elle y sera

en corps; ce qui n'arriue d'ordinaire que deux fois l'année, à sçauoir aux iours de la feste Dieu, & de la deliurance de la Ville de Tholose, & ces deux iours l'Archeuesque dit ordinairement la Messe, pendant laquelle il est à l'autel, & Messieurs du Parlement sont au chœur bien esloignez de luy. Quand sera-ce donc qu'il n'y aura point de milieu entre eux ? Il faut que ce soit quand Monsieur le premier President, ou autre de Messieurs du Parlement, y sont en particulier, & lors ils ne representent pas l'auctorité Royale, & lors la maxime contraire seroit plus vraye, qu'il ne faut pas qu'ils soient proches de l'Archeuesque, le diuisans d'avec son Clergé: car comme Messieurs du Parlement, par leur deliberation del'an mil cinq cens quatre vingt six, ont resolu de ne se point separer mesmes dans l'Eglise, il est encores plus raisonnable que le corps du Clergé n'y soit pas separé de son chef; Il y a tousiours eu dans l'Eglise vne muraille ou vn balustre entre les personnes Ecclesiastiques & les Laiques, & il a esté deffendu aux Laiques, de quelle qualité & cōdition qu'ils soient, de se meller parmy le Clergé dans les sieges du chœur, & d'empescher par ce moyen que l'office soit faict avec la liberré & attention qui y doit estre; quand nos Roys ont commandé qu'on suiuit cet ordre, on ne sçauoit pas cette maxime.

Mef-

*In plenitudine Ecclesia
concurritur societas
membrorum capiti suo
corpus constituitur. Euseb.
Emiss.*

*Hieronym. in Ezechiel.
c. 43. Synoda 6. in Tru-
lio can. 69.*

cy deuant pag. 10.

Messieurs du Parlement de Paris en vsent bien autrement, lesquels allans à l'Eglise de nostre Dame en particulier, se contentent des seances qu'on leur donne, & y allans en corps (aux ceremonies où le Roy se treuve) ils laissent le fonds du chœur pour les dignitez & chanoines de l'Eglise; & aux offices où le Roy n'assiste pas, ils laissent les quatre premiers sieges du costé de l'autel libres, pour estre occupez par Messieurs du chapitre, lesquels par ce moyen, ne sont pas separez de leur chef.

Pour dernier refuge, on a recours aux libertez de l'Eglise Gallicane qui ne peuuent seruir à cette pretention, car elles sont conformes aux anciens Canons de l'Eglise, & vniformes en toute la France, au lieu que la nouveauté qu'on veut introduire, est contraire à tous les Canons de l'Eglise, anciens & modernes, & à l'vsage de toutes les Eglises de Frâce, il ne s'en trouue d'exéple qu'en celle d'Aix, s'il estoit bien establi, au lieu duquel on oppose le Capitulaire de Charlemagne, qui declare coupable de sacrilege ce luy qui vsurpe vne place qui ne luy est pas deuë.

lib. 6. c. 230. si quis indebitum sibi locū usurpauerit, nulla se ignoratione deffendat, sitque plene sacrilegij reus, qui hoc agere tentauerit.

LA SECONDE QUESTION n'est pas si nouuelle que la premiere, car en l'année mil six cens trois, Monsieur le Cardinal de Loyeuse, Archeuesque de Tholose, estant à l'assemblée de

l'hostel Dieu, feu Monsieur de Verdun premier President, luy contesta le droit de presider.

Ils en escriurent au Roy l'un & l'autre, enuoyerent les Registres & les Statuts des assemblées, & plusieurs actes pour prouuer leur droit. L'affaire fut examinée en plein Conseil; & la pretention de Monsieur le premier Presidēt fust trouuée si peu raisonnable, que le feu Roy Henry le grād, de glorieuse memoire, luy commanda par lettre, de s'excuser de cette entrepr̄ise enuers Monsieur le Cardinal de Loyeuse, ce qu'il fit. Et il y a vne grande quantité de personnes dans la ville de Tholose qui en ont encores souuenance, mesmes de ce que Monsieur le Chancelier de Bellièvre escriuit sur ce sujet; que luy, qui precedoit tous les premiers Presidents, eust esté bien marry d'auoir entrepris ou pretēdu la pres̄eance en telles assemblées sur Monsieur l'Euesque de Paris son Pasteur. Plusieurs de Messieurs du Conseil ont souuenance de ce qui en fut ordonné; & le sieur de la Rocheffauuin, President aux Requestes du Palais à Tholose, fait mention de ce jugement dans son liure des Parlements, quoy qu'il y adiouste des modifications sans fondement, comme il sera monstré cy après; Si bien qu'il semble superflu d'examiner ce different, puis qu'il ne faut pas craindre que le Roy, par vn Arrest contraire, con-

*Quod Imperator per
epistolam constituit, le-
gem esse constat. §. sed
et quod principi. inst.
de iur. nat. gent. & ci-
uili.*

*Lib. 1. chap. 1. sect. 13.
n. 3. & 4.*

damne vn jugement si iuste, donné avec tant de cognoissance de cause, & par vn si grand Roy.

Neantmoins, pour faire voir la justice de son ordonnance, il est à remarquer, que l'hostel Dieu de sainct Iacques dans la ville de Tholose, situé au fauxbourg sainct Cyprien, proche de la riuere de Garonne, est de fondation, dotation, & de sa nature Ecclesiastique, & que la direction en a appartenu à l'ordinaire, tant auant qu'il y eust vn Parlement à Tholose, que depuis.

Car d'ancienneté c'estoit vne Chappelle, laquelle, pour les droits parrochiaux, dépendoit de la Cure de sainct Nicolas; & pour le droit de patronage, du Prieuré de la Daurade, ordre de sainct Benoist, situé dans Tholose. A cette Chappelle il y auoit vne Confrerie de plusieurs personnes, Ecclesiastiques, & laïques, qui s'y assembloient pour prier Dieu, pour faire des aumosnes, & prendre soing des pauvres. Il y auoit de semblables Confrairies quasi en toutes les Eglises & Chappelles de Tholose; lesquelles quand elles auoient quelque fonds de leurs contributions, & aumosnes, elles l'employoient à dresser des hospitaux, pour y receuoir les pauvres, malades ou necessiteux. Et d'autant que la Chappelle de sainct Iacques, à cause de sa situation, estoit plus propre à cet usage que les

*Tant ce nayré est prou-
ué par aïtes.*

autres, la charité s'y échauffa dauantage : en forte qu'en l'année mil deux cens vingt-huit, il fallut agrandir le logement des pauures ; & à cet effet le Prieur de la Daurade bailla aux Bailles & Confreres de ladite Chappelle, six brasses de large, à prendre de long en long sur le riuage de la riuere.

En l'année mil deux cens soixante sept, le Prieur du mesme Prieuré donna aux Bailles & Confreres, le fonds dudit Hospital, pour le public, se reseruant quelque superiorité, comme de nommer les Prestres qui seruiroient à ladite Chappelle, lesquels après prenoient de l'Euesque le pouuoir d'administrer les Sacrements ; & ne pouuoient rien faire sans estre approuuez par luy, comme il est porté par les registres dudit Hospital.

En l'année mil trois cens trois, ce Prieur donna à ladite Confrairie des maisons & jardins voisins, pour y establir des Religieuses, qui eussent soing des malades, se reseruant le droit de les pouuoir instituer, & destituer.

Comme on recogneust la commodité de cet Hospital, à cause du voisinage de la riuere, necessaire pour la netteté de tels lieux : La Confrerie de *corpore Christi*, instituée dans l'Eglise de saint Estienne (qui est la Metropolitaine) & dans la parroisse du Taur, qui auoit vn Hospital

tal proche de chacune de ces deux Eglises, voulant transferer ces Hospitaux en celuy de saint Iacques, commença par celuy de saint Estienne. Et d'autant que ces Eglises & Confreries dépendoient entierement de l'Archeuesque, & estoient sous sa direction, il presida à l'assemblée qui fut faite pour ce sujet, comme il est porté expressément par l'acte qui en fut dressé, en datte du vingt-huictiesme Auril mil trois cens quatre vngts vnze. Quelque temps après, l'Hospital de l'Eglise du Taur, qui estoit pour les enfans exposez, y fut aussi transferé, l'acte ne se trouue pas : mais il est vray-semblable qu'il fut fait en la mesme forme que le precedent, puis qu'il dépendoit de mesmes personnes.

L'acte porte, Reuerendissimo in Christo Patri domino Francisco misericordione diuina Archiepiscopo Tolosano presidente.

En l'année mil quatre cens huict, l'Archeuesque establit quatre surintendâts, pour gouverner ledit Hostel Dieu, lequel par le passé auoit esté regy par les Bailles ou Confreres, qui estoient administrateurs & surintendants tout ensemble.

Il n'y auoit point encore de Parlement à Tholose, & n'y fut estably qu'en l'année mil quatre cens quarante quatre.

En l'année mil cinq cens quatre, le Parlement ordonna que tous les autres Hospitaux de la ville, seroient transferez en celuy de saint Iacques, comme le plus commode. Et dés lors

l'Hospital de sainct Denis, celuy de nostre Dame du Puy, & plusieurs autres, qui dépendoiēt entierement de la direction de l'Archeuesque, y furent transferez.

En l'année mil cinq cens cinquante six, le quinziesme de Nouembre, par deliberation de l'assemblée dudit Hostel Dieu, il fut ordonné au Tresorier, de faire recepte du reuenu des Confreries abolies.

Les Presidents des Enquestes estoient Ecclesiastiques, comme le remarque de Luc. lib. 4. placit. tit. 4. Et pour cette cause ils tiennent encorés des offices de Conseillers clercs avec leurs Commissions.

En la mesme année, le troisieme Decembre, Monsieur Maistre Iean Barthelemy President aux Enquestes fist son testament, par lequel il donna vn benefice, nommé Ecclesiaste de Sarraut, pour estre vny à l'Hostel Dieu; fonda l'entretènement de quatre Prestres, pour consoler & instruire les malades, & leur administrer les Sacrements: Et par clause expresse, *Il supplie Monseigneur le Cardinal de Medon Archeuesque de Tholose, & ses Vicaires generaux, en son absence, de confirmer, & approuuer cette fondation, & l'autoriser, Comme superieur, & suppléer les deffaults, qui y pourroient estre.*

L'En des Presidents du Parlement preside en ses assemblées en l'absence de l'Archeuesque, comme il sera monstré cy après. Et le mesme testament fait mention de l'absence de l'Archeuesque.

Ce testament ainsi conceu, fut présenté en l'assemblée de l'hostel Dieu, en laquelle presidoit Monsieur le premier President de Mansencal, en l'absence de Monsieur le Cardinal de Medon Archeuesque, fut leu, approuué, & enregistré, avec ladite qualité de superieur, sans

aucun contredit.

Il est prouué par deux arrests, que quand le Tresorier a manqué de fonds, le Parlement a quelquefois ordonné, qu'imposition seroit faite sur les Ecclesiastiques, lesquels y font de grandes contributions ordinaires, particulièrement l'Archeuesque, les Chapitres de saint Estienne, & de saint Sernin, le Commandeur de Garridech, & autres; Ils en font aussi d'extraordinaires, tant volontaires, que contraintes: Car toutes & quantes fois qu'il y a des Eueschez, ou Abbayes en æconomat, le Parlement, à la requeste du Tresorier, ordonne à l'æconome de payer des notables sommes audit hospital, & quelquefois fait saisir les benefices, & applique le reuenu à l'hostel Dieu, comme il a fait celuy de la Commanderie de Garridech.

Cet hostel Dieu a encores vne metairie dépendante del'Archeuesché, à cause de la seigneurie de Balma. Et quand tous ces reuenus ne suffisent pas à la nourriture des pauvres, le Tresorier fait voir aux Capitoux la recepte & dépense, & ils fournissent à ce qui manque, aux dépens de la ville, dont l'imposition se fait sur tous les corps & ordres. Voila l'estat de la fondation & dotation del'hostel Dieu, selon qu'il se trouue par les registres qui restent, de plusieurs, qui auoient esté produits par feu Mon-

sieur le Cardinal de Loyeuse, contre feu Monsieur le President de Verdun.

Pour juger, qui doit auoir la direction d'un hostel Dieu de cette nature, & presider aux assemblées qui se font pour le regir, il faut distinguer trois choses.

La premiere, est la Iurisdiction contentieuse, & l'auctorité pour contraindre, laquelle, suiuant l'usage de France, appartient au Parlement, qui ordonne sur les appellations interjetées des resolutions du Bureau, ou sur les requestes presentées par Monsieur le Procureur general, ou le Tresorier de l'hospital.

La seconde, est l'administration, qui consiste, en la recepte & depence, & à pouruoir aux necessitez de la maison. Cette charge est commise à vn officier, qu'on appelle Tresorier, qui est pris des trois corps de la ville, à sçauoir de l'Eglise, des bourgeois de robe longue, & des bourgeois de robe courte, de chacun par ordre; & il change tous les ans.

Et bien que par les ordonnances de nos Rois les Ecclesiastiques soient exempts de cette administration, qui est onereuse, & qui est trop dans le tracas des affaires pour eux; neantmoins on les y contraint à Tholose, & aucun ne s'en peut décharger qu'en donnant cinq cens liures, suiuant vn ancien arrest du Parlement, sous couleur

couleur que ces ordonnances n'y ont pas esté receuës, ny verifiées.

La troisiéme, est la surintendance, qui appartient à vne assemblée, composée del' Archeuesque, d'un, ou de deux Presidents du parlement, quatre Conseillers (desquels il y en a vn d'Eglise) des gens du Roy, du grand Vicair de l'Archeuesque, des Capitoux, du Tresorier, du prestre semanier, du Medecin, du Chirurgien, du Procureur, du Scindic, & de tous ceux qui ont esté Tresoriers, soient d'Eglise ou seculiers, & de plusieurs autres.

Dans cette assemblée, on eslit les Tresoriers, & autres officiers, on commet des Commissaires pour ouir les comptes, lesquels après on arreste, & signe, on delibere sur les necessitez de l'hostel Dieu, on pouruoit à ce que les pauvres soient seruis & assiste, tant spirituelement que corporelement; on nomme des prestres pour faire le seruice, & administrer les Sacrements, qui après sont approuuez par l'Archeuesque, on ordonne de leurs gages, & de ceux des officiers; Que s'il suruient quelque affaire, qui gise en execution: Monsieur le Procureur general presente requeste au parlement, en vertu des arrests & ordonnances duquel on agit.

L'Archeuesque est le premier surintendant, & doit presider en telles assemblées, soit qu'on

regarde la fondation , dotation , & nature de l'hostel Dieu , ou la possession , & coustume de la prouince ; soit qu'on aye égard à l'vsage ancien de l'Eglise, au droit Ciuil, & Canon, & Ordonnances.

La fondation & dotation sont Ecclesiastiques, ç'a esté au commencement vne Chappelle, de laquelle le bastiment fut agrandy sur le fonds de l'Eglise ; les maisons & jardins sont donnez par le Prieur de la Daurade ; les hospitaux de toutes les autres Eglises de Tholose y sont vnies, & tous les reuenus des Confreries abolies, qui sont aumosnes, oblations, & contributions de pieté, desquelles la direction appartient à l'Eglise.

Surquoy est à considerer, que chaque Eglise de Tholose, auoit son hospital, & sa Confrerie pour le regir ; & ce (comme il est vray-semblable) en suite des Canons, qui enjoignent aux Ecclesiastiques d'exercer l'hospitalité enuers les pauures, & en donner l'exemple au peuple, à fin de le disposer par après à cette action de charité. Les Confreries estoient instituées à cet effect, comme il se lit au Concile de Gangres, qui prononce anathème contre ceux qui fuyent, ou méprisent les exercices des personnes, qui employent fidelement les Agapes, traittent les pauures, & conuoquent des Confreres pour l'honneur de Dieu.

Iustin. Martyr. apol. 2.

*Can. 1. dist. 42. necesse est
Et sacerdos pauperes
hospitio recipiat, quo,
ad hospitalitatem faci-
lium suo exemplo sub-
ditos attrahat.*

*Si quis despiciat eos, qui
fideliter agapes, id est,
conuiuia pauperum ex-
hibent, Et propter ho-
norem Domini conui-
cant fratres, Et uolue-
rit communicare, huius-
modi conuocationibus
parui pendet quod ge-
ritur, anathema sit. Co-
cil. Gg. in can. si quis.
42. dist.*

De telles Cōfreries l'vſage a eſté de tout temps à Tholoſe: & Monsieur Duranty, premier Preſident, en fait mention en ſon liure des ceremonies de l'Egliſe.

Lib. 1. c. 66. n. 9.

Ces aſſemblées ont eſté touſiours tenuës dans les Eglises, & ſoubs l'autorité de l'Archeueſque, & ont eſté regies par des directeurs ou ſurintendants, qu'à Tholoſe on appelle Bailles, deſquels il y en a touſiours quelque vn Eccleſiaſtique, qui preſide, & precede tous les Confreres, tant Preſidents de la Cour, qu'autres, quād le Baille ſeroit le moindre Chappellain de l'Egliſe, comme il ſe voit par les extraicts d'un grand nombre d'actes.

En ces Confreries, il ſe faiſoit de tout temps certaines contributions volontaires, appellées par Tertulian *depoſita pietatis*, qui eſtoient employées en aumônes, ſelon l'ordonnance des Bailles.

Paul 1. Corinth. 16. Tertul. Apol. c. 39. modicam unusquisq; ſtipem menſtrua dæ, ſecum ſelit, & ſi modo ſelit, & ſi modo poſſit, apparet, nā nemo compellitur, ſed ſponte cōfert, hac quaſi depoſita pietatis ſunt, &c.

Puis donc que l'hoſtel Dieu a eſté inſtitué, & regy par vne Confrerie, que tous les autres de Tholoſey ont eſté vnīs, qui eſtoient eſtablis par les Eglises, & augmētez par les Confreries; & que tous les reuenus des Confreries abolies y ont eſté incorporez, qui doute qu'il ne retienne ſa premiere & ancienne nature, d'eſtre regy par vn chef Eccleſiaſtique, qui precede tous les autres, quand ils ſeroient Preſidents. Cela eſtāt,

qui peut dénier à l'Archeuesque le droit d'y presider, comme chef? puis qu'il auoit droit de presider aux Confreries, & y a presidé pour transferer les hospitaux qui en dépendoient, en celui de saint Jacques.

Il a esté remarqué, que les plus grandes contributions, & quelquefois toutes, se font par l'Eglise, qu'il y a des benefices vnis; outre ce, plusieurs Ecclesiastiques ont fait l'hospital heritier, comme depuis vingt ans vn Chanoine de saint Estienne, vn Recteur du Diocese, vn Prestre de saint Nicolas, & autres: Monsieur Barthelemy, Prestre, y a fait de grands biens; de maniere que la fondation, & la dotation sont Ecclesiastiques.

De sa nature il est aussi Ecclesiastique, ç'a esté vne Chapelle dès son commencement, il y a des autels, où plusieurs seruices sont fondez, on y gaigne des Indulgences, tous les Sacraments y sont administrez, on y dit des Messes parrochiales, on y fait l'eau beniste, le prosne, le sermon, la doctrine Chrestienne, & y a quatre ou cinq Prestres entretenus à cet effect, qui assistent les malades, & enterrent les morts dans vn cemetiere qu'ils ont, il y a vn clocher, qui sont marques certaines que la maison dépend del'Archeuesque, comme il est porté en termes exprés par le Concile de Vienne; les enfans

fans exposez y sont esleuez, desquels le soing est imposé à l'Eglise par les ordonnances. Il y a quatre surintendants Ecclesiastiques. Et toutes & quantes fois que pour les maladies ou autres incommoditez on n'y peut tenir le conseil, il est transferé en quelque maison Ecclesiastique, comme il a esté plusieurs fois au Monastere des Carmes, & se tient tousiours es jours de feste, ou Dimanche, comme les Confreries & Congregations de pieté, desquelles il a eu son commencement. Et quand quelque Archeuesque, ou Euesque de la prouince, ou d'ailleurs, se renéotré à Tholose, il a entrée ausdites assemblées, cômme l'Archeuesque d'Aix, les Euesques de Lodesue, de Tarbe, & d'Aure, y ont esté plusieurs fois depuis soixante - six ans, & y ont eu seance après les Archeuesques de Tholose, deuant les Présidents, & Conseillers de la Cour; Que si c'estoient des assemblées politiques, ils n'y auroient eu entrée quelconque. Bref, c'est vn hostel Dieu, le nom en monstre la nature.

L'assemblée qui s'y fait est composée de trois ordres de la ville, à sçauoir, de l'Eglise, des bourgeois de robe longue, & des bourgeois de robe courte; l'Eglise constitué le premier, & preside d'ordinaire en telles assemblées, comme elle fait aux Estats, & assemblées, qui sont composées des ordres de la prouince ou des dioceses.

O.

Barcard. lib. 1. c. 94.

Les Archeuesques ont eu dès le commencement la direction de cet hospital, & en ont tousiours continué la possession: car on n'a pas fait vn cemetiere, vnclocher, ny eu le droit d'administrer les Sacrements, que sous l'adueu de l'ordinaire; la Confrerie, par laquelle ledit hostel Dieu estoit regy, & à laquelle ont succédé les surintendants, n'a peu estre establie que par la permission, & sous l'autorité des Euesques, lesquels ont approuué les Prestres, & leur ont donné le pouuoir de faire les fonctions curiales: ils ont transferé les autres hospitaux en celuy-cy, & preside aux assemblées, qui ont esté faites pour ce sujet, ils y ont fait & créé des intendans, & dressé des statuts, & en ont esté les directeurs absolus deux cens ans deuant qu'il y eust des Presidents à Tholose; & on ne trouue pas que nos Rois, par l'establissement du Parlement, ayent voulu diminuer en rien l'autorité de l'Eglise; et de fait, il a esté remarqué, comme depuis son erection, Monsieur le President Barthelemy y a recognu la superiorité des Archeuesques, au veu & sceu de Monsieur le premier President de Mansencal, qui ne la pas dénié.

Monsieur le Cardinal d'Armagnac fut fait Archeuesque de Tholose au mois d'Aoust de l'année mil cinq cens soixante deux: aussi tost

qu'il fut proposé il entra en ces assemblées, & y presida en presence de Monsieur d'Affis premier President, & continua après sa prise de possession, y menant avec soy des autres Euefques qui prenoient seance après luy, deuant le dit sieur President d'Affis.

Monsieur de Foix ayant esté pourueu de l'Archeuefché de Tholose apres Monsieur le Cardinal d'Armagnac, entre autres bons desseins qu'il auoit pour regler son Diocese, lors qu'après son Ambassade de Cour de Rome il y eust esté de retour, proposoit d'auoir vn soing tres particulier des hospitaux, si Dieu n'en eust disposé autrement; il n'ignoroit pas l'vsage de Tholose, ou il auoit passé vne partie de sa ieunesse.

Marc. Ant. Muret. en sa Harangue funebre.

Monsieur le Cardinal de Loyeuse, ayant pris possession del'Archeuefché, en l'année mil cinq cens quatre vingt dix, se rendit assidu dès le commencement ausdites assemblées, & y presida tousiours, sans que les premiers & autres Presidents du Parlement, y ayent iamais reclamé, non plus que les Conseillers & gens du Roy qui l'y assistoient, & desquels le plus ancien tenoit tousiours la place du premier President, il continua cette possession iusques en l'année mil six cens trois, pendant lequel temps il fit sa visite dans l'hospital, commit plusieurs fois des

Conseillers de la Cour , Commissaires , pour ouyr les comptes, les signa le premier, approuua les Prestres, les manda souuent pour venir aux processions, comme ils y sont tousiours allez & y vont encores au mandement del' Archeuesque.

En l'année mil six cens trois , Monsieur de Verdun qui venoit d'estre pourueu de l'office de premier President , ayant voulu troubler ceste possession, en fut blasmé par le Roy , comme il a este dit, & ledit sieur Cardinal, continua de presider en trois assemblées, apres lesquelles estant appelleaux affaires publiques , il quitta Tholose, & enfin n'y pouuant pas resider, resigna l'archeuesché , & c'est le dernier estat de la possession.

L'usage de la Prouince est conforme à celuy de Tholose, & le Parlement le confirme toutes & quantesfois qu'il y suruient des contestations. Il a adjudgé par ses Arrests, la direction de l'hospital du Puy en Velay, de celuy de Tarbes, & de plusieurs autres, aux Euesques des lieux, pardessus les officiers du Roy ; & de fraische memoire, Monsieur le Masuier premier President , ayant esté nommé arbitre des differents qui estoient entre Monsieur l'Euesque de Lectoure, & le Seneschal, eust avec soy pour conseil, des plus habiles Conseillers & Aduocats du

Parle

*Arrest des Grands iours
tenus au Puy, le der-
nier iour d'Octobre
1542.*

*Arrest pour Tarbe du
12. Iuin 1617.*

Parlement, par l'aduis desquels il ordonna que l'Euesque seroit appellé aux assemblées de la maison de Ville, & que neantmoins le Magistrat en auroit la direction; & que pour les assemblées du Bureau des pauvres, l'Euesque en auroit la direction, & en son absence le Juge Mage, distinguant en cela les assemblées de la maison de Ville comme politiques, de celles de l'hospital comme Ecclesiastiques. Par ceste sentence qui est du dixseptiesme May, mil six cens vingt six, Monsieur le premier President a iugé conformément à l'usage de Tholose, qui est la Ville capitale du ressort, où l'Archeuesque pre-
fide en telles assemblées, & en son absence le Magistrat.

*Quod quisque iurii in
alium statuerit eodem
ipso irritum.*

L'usage de l'Eglise & le droit donnent aux Euesques l'entiere direction des hospitaux. Car dès le commencement du Christianisme, ceux qui suiuaient le conseil euangelique, vendoient leur bien pour donner l'argent aux pauvres, en deferoient la dispensation aux Apostres, desquels les Euesques sont successeurs. Et lors que l'Eglise commença à jouir de quelque paix & liberté, les Ecclesiastiques employoient ces deniers, & les leurs, en maisons & fonds, pour loger & nourrir les pauvres, comme firent S. Zoticus, S. Pammachius, S. Sanson, & S. Exupere Euesque de Tholose, qui est appellé

*Act. 4. afferbant pretia
eorum qua vendebant
& ponebant ante pe-
das Apostolorum.*

Martyrolog. Roman.

*D. Hieron. ep. 4. ad Ru-
sicum. 11. ad Ageru-
chiam.*

apud Hermianum Sexton.
lib. 5. cap. 25.

pere des pauvres par saint Hierosme. aussi l'empereur Iulien, exhortât les Pontifes payens à construire des hospitaux & prendre soin des pauvres, leur proposoit l'exemple des euesques Chrestiens, ausquels cet employ estoit si propre, que l'empereur Iustinian en sa compilation du Code, a redigé les constitutions de ses predecesseurs qui parloient des hospitaux sous le tiltre de *Episcopis & Clericis* : & n'a laissé aucune part aux juges seculiers en cette direction que pour l'execution & contrainte, comme il se veoit en vne de ses Nouuelles. Le Pape Gregoire IX. a reduit toutes les Decretales qui en traitoient, sous le tiltre de *Religiosis domibus & Episcopo sint subiectæ*, ausquels lieux cette charge leur est imposée par plusieurs loix & Chapitres; Aux cahiers des Estats, il n'est traité de cette matiere que parmy les reglements des choses ecclesiastiques, côme en ceux de Tours & derniers de Paris; les Conciles de l'Eglise, mesmes ceux de France, sont formels sur ce sujet. Au cinquiesme Concile d'Orleans, tenu l'an cinq cens cinquante deux, la fondation d'un hospital de Lyon faicte par le Roy Childebert, est confirmée à la requisition du Roy, & la surintendance & entiere direction en est donnée à l'Archeuesque de Lyon; que si cela à lieu aux hospitaux de fondation Royale, à plus forte

raison en ceux qui sont de fondation Ecclesiastique, comme celuy de Tholose ; Bref, le Concile de Trente qui est receu à Tholose, tant au Palais qu'à l'Eglise, & obserué comme vne loy tres-saincte : enjoint aux ordinaires d'auoir la sur-intendance des hospitaux, à ce qu'ils soient bien administrez & regis, quand meismes les administrateurs seroient exempts, renouuellant en cela les Canons du Concile de Vienne, & de plusieurs autres, comme de Calcedoine, d'Aix-la Chapelle, & de Meaux, desquels a esté formé le Canon du Concile prouincial de Tholose, tenu l'année mil cinq cens quatre vingt dix, par lequel il est ordonné que les hospitaux qui ne sont de fondation Royale, seront visitez par les ordinaires, & qu'ils prendront soing des pauvres, & feront rendre compte aux administrateurs. Ce Canon est publié & obserué dans toute la prouince, depuis trente huiet ans sans contredict.

Le Parlement de Paris a adugé à l'Eglise, la direction des hospitaux semblables à celuy-cy, comme de celuy de Peronne aux Chanoines & chapitre, & le Conseil a adugé celle de l'hospital de Coiffort près du Mans, aux Doyen, Chanoines & chapitre du lieu. A Paris quand les Doyen, Chanoines & Chapitre de nostre Dame vont au bureau de l'hospital, ils ont la pre-

seance pardeffus tous les Magistrats qui y sont, à quoy est conforme l'ordonnance de Melun.

Monsieur le premier President pretend d'y deuoir presider, & que l'Archeuesque doit prendre seance après luy, deuant tous Messieurs de la Cour, à quoy il y a peu d'apparence, car l'Archeuesque n'y assiste pas comme Conseiller où Commissaire de la Cour, mais de son chef, & par l'obligation de sa charge Pastorale, & en son absence son grand Vicaire y est; Et Messieurs du Parlement y assistent, où comme particuliers, où comme Commissaires de la Cour: car de dire qu'ils y soient en corps, il n'y a point d'apparence, puis qu'ils n'y vont qu'és iours de feste, & sans les marques de la Cour en corps; s'ils y sont comme particuliers, ils n'y doiuent pas preceder l'Archeuesque non plus, qu'en tous autres endroits; s'ils y sont comme Commissaires de la Cour, ils ne se doiuent pas separer les vns des autres, d'où il s'ensuit qu'il faut ou que l'Archeuesque les precede tous, ou qu'il prenne seance après tous; le dernier est sans exemple, & ne l'ont iamais pretendu, il faut donc qu'il les precede tous.

Et bien qu'une partie des hospitaux qui ont esté vnies à celuy de S. Iaques dependit des maisons Regulieres; il est neantmoins certain que la plus grande partie dependoit des Eglises subiectes

jectés à l'Archeuesque, & que tous les Confreres ou Administrateurs, & les hospitaux, estoient sous sa direction, mesmes ceux desquels les Religieux auoient le soing ; Car l'exemption accordée par le S. Siege à quelques communautéz, n'est que pour leurs personnes, & pour les lieux reguliers, & non pas pour ce qui depend de l'administration des Sacrements & discipline extérieure. Et particulièrement en ce qui est des hospitaux, ils sont subjets aux Euesques comme il est décidé par le Concile de Vienne, & par celuy de Trente.

*Clem. quia contingit. de
Relig. domib. Concl.
Trident. sess. 7. can. 15.*

Quand les personnes laïques auroient contribué à l'augmentation & entretenement de cest hospital (comme on veut dire) l'Archeuesque n'y auroit pas moins de droict : d'autant que ce seroit par des laïcs pieux, desquels l'exécution & dispensation depend de l'ordinaire : la plus grande partie des benefices & Eglises sont fondées par la contribution des personnes seculieres, les Magistrats n'en ont pas pour cela la surintendance.

On allegue, que les Capitoux ont la direction de l'hospital de S. Sebastien ou de la Graue, au Fauxbourg de Tholose, qui est pour les malades de la peste : cela est vray, aussi les Archeuesques ne s'y sont iamais ingerez, que si le soing en fût demeuré aux Capitouls seuls, & que per-

Q

sonne autre ne s'y fut plus interessée que les Archeuesques, la maison se fut trouuée libre & meublée, comme elle auoit esté d'ancienneté, pour receuoir les malades, & loger les Prestres qui se sont offerts pour les secourir, dès que le mal a commencé d'affliger la Ville de Tholose, lesquels on n'a peu si tost employer à faute de logement.

Les ordonnances qu'on objecte ne parlent que de la reformation des abus, ou de l'administration des hospitaux, & non de la direction ordinaire, encores n'ont elles pas esté verifiées au Parlement de Tholose où l'on contraint les Ecclesiastiques d'en prendre l'administration, & les Euesques sont en possession dans tout le ressort, de presider aux assemblées des Bureaux des pauures, aussi on demeure d'accord que l'Archeuesque de Tholose y doit assister; la question n'est que pour sçauoir qui presidera. Et ne sert de rien d'alleguer les exemples de quelques autres hospitaux, qui sont hors du ressort, car il faudroit en monstrier les fondations, qui peuuent changer le droit commun.

On oppose les actes de quelques assemblées auxquelles feu Monsieur le Cardinal d'Armagnac Archeuesque de Tholose, est nommé apres Monsieur le premier President d'Affis. Et sur ce fondement feu Monsieur le President de

Verdun entreprit de presider Monsieur le Cardinal de Ioyeuse: mais le Roy recogneut que le Greffier n'auoit pas gardé l'ordre des seances, ains auoit escript le nom des Intédants, à mesure qu'ils arriuoient, comme il se voit qu'en quelques vns desdits actes, non seulement ledit sieur premier President est nommé deuant ledit sieur Cardinal, mais encores d'autres qui ne pretendirent iamais de le preceder. Il n'y a rien de si fautif dans les actes, que l'ordre des qualitez, auquel vn Greffier gratifie ceux qu'il veut, ou peche par inaduertance, comme on voit d'ordinaire, mesmes aux actes des Conciles, où les Presidents sont bien souuent nommez confusement, aussi on ne s'y arreste pas quand il apparoiſt d'ailleurs du droict. Le feu Roy Henry le Grand, ne laissa pas pour ces mesmes actes de condamner ledit sieur President de Verdun, à ceder. Et despuis ce petit nombre de seances il s'en trouue plus de vingt-cinq, esquelles Monsieur le Cardinal de Ioyeuse à presidé en presence des Conseillers de la Cour, en presence aussi des gens du Roy, au veu & sceu de tous les Presidents, qui n'ont point reclamé. Messieurs du Parlement auoient vne possession mieux establie aux Conseils de la maison de Ville, qu'ils ne l'ont iamais eu en ceux de l'hostel Dieu, ils n'ont pas laissé de la perdre par arrest du Con-

Qij

seil de l'an mil six cens vingt trois, sur la cognoissance qu'on a; qu'un grand corps estend facilement son auctorité aux moindres occasions, si bien que quand il auroit entrepris à l'hostel Dieu, il faudroit tousiours reuenir à la verité, & rendre à chacun son droit.

Si ceste assemblée faisoit des Arrests, comme on veut dire, ou quelle eust vne iurisdiction contentieuse, elle ne s'etiendroit pas aux iours de feste, ne hors du Palais comme elle fait. Le Parlement y seroit en corps ou en nombre suffisant pour faire des arrests, & les Capitouls ne feroient pas reformer ses ordonnances.

Pour les impositions qu'il faut faire, l'assemblée prie & exhorte les Capitouls de les faire, & si les prieres ne sont en forme agreable à la maison de Ville, elle les fait reformer, où n'y a aucun esgard. Les resolutions sont portées de l'Hostel Dieu à la maison de Ville, où elles sont encores examinées, & deliberatio est prise sur icelles, laquelle est après présentée au Parlemét, tout cela ne se feroit pas, si ladite assemblée auoit auctorité coactiue, ou quelle donna des Arrests. Aussi le Chirurgien, le Medecin, le Procureur, y ont voix deliberatiue, lesquels n'ont point de jurisdiction pour donner des Arrests. Et pour les amendes de ceux qui refusent l'administration, elles s'exigent en vertu d'un ancien Arrest du
parle

parlement, & non des deliberations de l'assemblée, lesquelles ne seront pas de moindre force, quand, outre tous ceux qui y assistent, l'Archeuesque y sera pour auoir la direction, il peut presider aux estats generaux du pays, où il se traite des affaires plus seculieres & plus importantes, que celles de l'hostel Dieu, & les resolutions qui s'y prennent, ne sont pas d'autre nature qu'elles estoient, lors que Messieurs les Cardinaux de Medon, d'Armagnac & de Loyeuse, en estoient les directeurs. Et quand il y auroit iurisdiction contentieuse, l'Archeuesque l'auroit, en matiere d'aumosnes & d'œuvres pies, comme sont celles-là ; le Parlement la iugé ainsi par ses ar-

Il y en a vn Arrest imprimé, avec les statuts Synodaux de Tholose.

LE TROISIÈME DIFFÉRENT procede, de ce qu'à la Pentecoste derniere, les Religieux de saint Dominique, tenans leur Chapitre general à Tholose, proposerent des Theses en Theologie: lors les estats du Languedoc, y estoient assemblez, esquels y auoit plusieurs Euesques de la Prouince, & l'Archeuesque de Tholose y presidoit. Le Pere general des Iacobins ayant prié, & fait prier par vn bon nombre de ses Religieux, lesdits Archeuesque & Euesques, de se trouuer aux disputes, ils y assisterent, après qu'ils eurent sceu, qu'on leur auoit

préparé des sieges, en rang séparé de Messieurs
 du Parlement, & que Monsieur de Montrabe
 President en la grand chambre, & Monsieur de
 Cambolas President aux Enquestes, qui y
 estoient arriuez les premiers, auoient assuré
 que Messieurs du Parlement ne se pourroient
 plaindre del'ordre des seances, comme il estoit
 préparé. Et de fait, ils y furent & receurent les
 premieres salutations des Professeurs & Do-
 cteurs del'Vniuersité qui disputerent, & l'as-
 semblée se passa fort paisiblement sans aucun
 resmoignage de mescontentement de la part de
 Messieurs du Parlement, qui y estoient en
 grand nombre. Ce iour là, Monsieur le premier
 President n'y assista pas, pource qu'il auoit as-
 semblé le Conseil de l'hostel Dieu, pour faire re-
 soudre, que l'Archeuesque y venant, prendroit
 place après luy, mais il n'y treuua pas les opi-
 nions conformes à son intention, qui fut cause
 qu'il ne resolut rien. Le lendemain qui estoit le
 treizieme iour du mois de Iuin, & la derniere
 Feste de la Pentecoste, les Religieux propose-
 rent des Theses, *De scientia Dei, de voluntate*
Dei, de auxiliis diuinae gratiae, de prouidentia Dei,
et predestinatione. Et si l'Archeuesque eust creu
 que sa presence eust causé vne si grande esmo-
 tion qu'elle fit, il se fut abstenu d'y aller, pour
 donner loisir à Monsieur le premier President,

& autres, de s'informer de l'ordre qu'auoient gardé leurs predecesseurs, & qui se garde aux autres Parlements: cômepour mesme raison il auoit differé, d'assister aux offices dans s'eglise, & d'aller aux assemblées de l'hostel Dieu; où Monsieur le premier President luy auoit denoncé la contestation, il eust esperé, qu'un peu de temps, eust donné cognoissance à vn chacun de ses rangs, & empesché toute contention. Mais ne l'ayant peu preuoir, la consideration du respondant, qui estoit vn Religieux François, & de la matiere, qui est difficile & controuersée dans les escholes, & la priere des Religieux, l'inuiterent d'y aller avec Messieurs les euesques de Cisteron & de Lodesue; Monsieur l'euesque de Mirepoix, Docteur de Sorbonne, & l'un des plus anciens Prelats & Predicateurs de France, y vint apres eux, ils estoient avec le Rochet, le Camail, & le Bonnet, & l'Archeuesque avec sa Chappe pôtificale. Aussi-tost qu'ils furent arriuez, l'un des professeurs de l'Vniuersité leur vint dire, qu'il auoit esté aduerty, que Monsieur le premier President auoit assemblé chez soy quelques vns de Messieurs du Parlemēt, & resolu de venir aux disputes, & amener Monsieur de Fiobet Aduocat General, afin que si les disputans saluoient lesdits sieurs Archeuesque & euesques, deuant que ledit sieur

premier President & autres de la Cour, ledit sieur Aduocat prit sur le champ des cōclusions contre lesdits disputants, qui demandoient ce qu'ils auoient à faire, l'Archeuesque creût qu'il falloit empêcher ce desordre, & gagner le loisir d'en conferer de sang froid avec Messieurs de la Cour: C'est pourquoy il fit respōse, qu'ils ne saluassent persōne, mais qu'en termes generaux, ils se promissent la continuation de la faueur qu'ils auoient receu le jour precedent; ce qui fut fait par tous, & Monsieur l'Aduocat General n'eut sujet de plaider.

Monsieur le premier President & Monsieur de Caminade second President, y arriuerent, ayans avec eux ledit sieur Aduocat, ils prindrent la seance que les autres Presidents auoient occupé le jour precedent: & aussi tost ledit sieur premier President se leua, & sans plaider ny rapport precedent, prit les opinions de cinq ou six, de vingt ou trēte Cōseillers qu'il y auoit, & après s'en vint à l'Archeuesque, esloigné de luy, de quatre pas, & tout en chaleur, sans saluer, luy dît ces paroles, *Vous estes du corps du Parlement. Ne voulez-vous pas prendre vostre place parmi la Cour?* L'Archeuesque luy respondit: Qu'ils estoient dans l'Eglise, & non au palais, & que son caractere & celuy de ses confreres, les faisoient juges des questions de
Theolo

Theologie, comme estoient celles qui se trait-
toient, au lieu que Messieurs les Presidents &
Conseillers n'y estoient que comme assistans. Il
s'esmeut encore dauantage de ceste responce:
& prenant sa chaire, la traîna avec violence au
deuant des genoux de l'Archeuesque, luy di-
sant, avec vne parole pleine d'aigreur, *Vous estes*
venu icy pour troubler le seruice du Roy, L'Ar-
cheuesque respondit, Qu'en ce qui estoit du serui-
ce du Roy, il ne cedit à personne en respect. Il ad-
jousta, *Que l'Archeuesque vouloit fouler aux*
pieds l'autorité du Roy, & que le Parlement n'e-
stait pas si foible que de le souffrir. Que l'assemblée
estoit politique, & qu'il ne pouuoit ignorer sa qua-
lité. L'Archeuesque respondit, *qu'il la cognois-*
soit & l'honorait. Monsieur le President de Ca-
minade qui auoit aussi porté sa chaire deuant
les genoux de M^{rs} l'Euesque de Mirepoix,
dit, *Vous le tesmoignez mal, vous tenés des mau-*
uais principes, & nous vous le monstrerons bien:
accôpagnant ces paroles d'un geste de mena-
ce avec la main; l'Archeuesque qui voyoit que
le peuple s'émouuoit de ceste action, craignant
un plus grand desordre, n'en tesmoigna aucun
ressentiment. Apres ce tumulte les disputes cō-
mencerent, & Monsieur le premier President
pour faire le modérateur, dit à un disputant ces
mots de latin: *Extolle vocem non te exaudit,* &

les Prelats se retirerent, dresserent procès verbal du tout, & le lendemain le bruit de cette action estât grand, tous les Euesques qui estoient à Tholose en nombre de dix, s'assemblerent, & resolurent d'en faire plainte au Roy, luy enuoyer le procès verbal, & en demander quelque satisfaction pour l'Eglise & pour le public.

Toutes les circonstances de cette injure, la rendent atroce; elle a esté premeditée, & attentée par les brebis contre leur Pasteur, par les enfans contre leur pere; vn jour de feste, dans vne Eglise, au deuant du maistre autel, où vn criminel seroit en seureté, les Estats generaux de la prouince, & vn Chapitre general de Religieux, assemblez de tous les endroits du monde, sont témoins de cette action, qui publieront par toute la Chrestienté, comme ils ont veu baffouër les Prelats, dans vne ville des plus Catholiques de France, & ce de l'autorité du Roy, comme si les préeminences del'Eglise, estoient contraires à son service, & suspectes à l'Estat; Qui est vne pensée plus esloignée des sentimens de nos Rois, que de tous les Princes du monde: car ce sont eux-mesmes qui ont augmenté de tout leur pouuoir ses honneurs, & y ont employé leurs plus belles actions, par lesquelles ils ont acquis les tiltres de tres-Chrestiens, & de fils aînez de l'Eglise.

Plusieurs des Religieux estrangers, qui se trouuerent scandalisez de cette procedure, en témoignerent leurs sentimens, qui ne seront pas rapportez icy, pour l'honneur de ces Messieurs; il suffira de dire, que celuy qui en parla avec plus de retenue, fut vn Espagnol, qui estât en chaire, quelques iours après, dit que les Euefques deuoient auoir les premieres seances en l'Eglise de Dieu.

Le scandale eust esté encores plus grand, si l'Archeuesque n'eust deffendu aux disputans de salüer personne, aimant mieux se priuer pour cette fois de l'honneur deu à sa dignité, que de voir vn tel iour, dans vn lieu sacré, en si celebre assemblée, Monsieur l'Aduocat general plaider, comme dans vn barreau; & encore plaider contre l'Eglise. *In Capitolio fulminantem peierare Iouem.* Et deuant ces Messieurs, qui estoient sans chapperons, sans Greffier, sans Huissiers, & qui n'auoient aucune marque de leur autorité, laquelle aussi estoit suspendue à cause du lieu. Et d'ailleurs, la Cour n'y estoit pas en corps, & ceux qui y estoient, n'auoient point de commission; Que si elle estoit en corps, le second President n'auoit pas pouuoir de parler en presence du premier: car vn corps n'a qu'un chef, & qu'une bouche; & pour mesme raison l'Archeuesque estant après ledit sieur premier Pre-

sident aux disputes, n'auroit pas le pouuoir d'y parler, qu'on demeure d'accord qu'il a.

*apud A. Gellium lib. 14.
c. 7.*

Si la Cour estoit en corps, le second Presidēt n'auoit pas plus de pouuoir de preceder les Prelats en celieu là, que dans le Palais, où tous les Euesques le precedent. Si la Cour estoit en corps, ledit sieur premier President ne pouuoit pas refoudre vne entreprise de telle consequence sur l'aduis de cinq ou six, il falloit prendre les opinions de tous ceux du corps qui y estoient, *Singulos debere consuli gradatim*, disoit Varron en son commentaire *de officio Senatus habendi*. Et si la Cour estoit en corps ce iour là, aux disputes, elle y estoit aussi le iour precedent, pendant que Monsieur le premier President, avec plusieurs Conseillers, & gens du Roy estoient en corps de Cour, à l'assemblée de l'hospital, comme ils le soustiennent; par ce moyen il se trouueroit qu'en mesme temps le corps de la Cour estoit en deux lieux differents. Mais pour ce que cela seroit fort extraordinaire, il est plus à propos de croire que la Cour n'est en corps, que lors qu'elle est assemblée dans le Palais, ou qu'après deliberation prise, elle en part pour aller en quelque action, en laquelle elle doit se trouuer en corps, & que les Huissiers marchans deuant Messieurs les Presidents, Conseillers, & gens du Roy, vont avec leurs robes & chaperons,

perons, ce qu'on appelle aller en figure.

Que si on veut qu'un nombre de Presidents ou Conseillers fasse ou represente le corps de la Cour ; pourquoy vn Archeuesque & trois ou quatre Euesques , ou mesmes vn Euesque avec deux autres Ecclesiastiques, ne feront-ils pas vn corps d'Eglise , puis que Dieu a dit que là où il y en aura deux ou trois assemblez en son nom il fera au milieu d'eux, & que trois representent l'Eglise ; Et le Roy n'a jamais donné pouuoir à vn si petit nombre de Presidents , ou de Conseillers, d'administrer sa Iustice souueraine , ou vser de son autorité. Que si on pretendoit que le corps de la Cour eust la preface sur le corps del'Eglise, l'entreprise seroit trop grande ; il y a plus d'apparence qu'on entendit de contester de particulier à particulier , veu mesme que le Parlement n'estoit pas en corps. Et cela estant, on n'auoit pas pouuoir de rien ordonner, & moins encores d'excuter aucune deliberation, comme on fit ; le lieu aussi ne le permettoit pas. Si vn Iuge auoit jugé hors de son siege, la sentence seroit nulle : Mais dans l'Eglise, outre la nullité, il y a le mépris de Dieu, qui a voulu que sa maison fust vne maison d'oraison, dans laquelle les actions d'ailleurs necessaires ou indifferentes luy sont desagrecables , comme de manger, ou vendre les choses propres pour les

*Paul. 1. Cor. 11. Ecclesiā
Dei contemnitis.*

T

*Domus mea domus
orationis vocabitur,
Eccl. Marci II.*

*Clem. decret. §. 2. de Im-
munit. Eccl. fori cuius-
cumq; tumultus, omnis
in eis secularium stre-
pitus conquiescat, &c.
Sunt loca eadem à lai-
corum cognitionibus a-
liena; Ordinarij locorū
hoc faciant obseruari.
Indicium sacriarium
prolata sententia in eis-
dem locis, omni careant
robore firmitatis. Qui
vero promissas inhibi-
tiones animo petulanti
contempserint, prater
processum ordinariorū,
diuina celsionis poterit
acrimoniam formidare.*

*S. Augst. cōtra donat.
solentur qua nolu-
mus, Et perueniamus,
quo volumus, Sentes
cautela praecepti Domi-
nici, ne cū uoluerimus
ante tempus colligere
Xianiam, simul tra-
dicemus & iustitiam.*

sacrifices : & encores plus d'un lieu de sainteté, en faire un lieu de tumulte & de violence. Le Concile general de Lyon, au Canon qui commence, *Decet domum Dei sanctitudo*, & les autres Conciles cy deuant cottez, qui portent excommunication contre telles actions, peuuent faire cognoistre l'enormité de cette entreprise à ceux, qui sont interieurement persuadez, du respect qu'ils doiuent à Dieu & à son Eglise; Que si l'Archeuesque n'a pas usé de son autorité, pour éviter un plus grand scandale, il a laissé croistre l'yuroye dans son champ jusques à la moisson, de peur d'arracher le bon bled, avec la mauuaise plante : Car, quelle deference pouuoit-il esperer aux censures de l'Eglise ? par des personnes qui estoient si irritées; pour le voir en vne place separée des leurs, & non après elles, suiuant leur desir, qu'elles le menacerent & le diffamerent, comme perturbateur du seruice du Roy.

D'autant que pour deffendre cette voye de fait, par les questions de droit, on soustient que l'assemblée estoit politique, que Messieurs du parlement en estoient juges, & non pas l'Archeuesque; Qu'ils doiuent estre saluez les premiers, & auoir la prescence. Il est à propos de faire voir le contraire.

Les actions qui se font à Tholose ne sont

pas d'autre nature que les mesmes quand elles sont faites ailleurs : On a veu à Paris des disputes en vn Chapitre general des Iacobins, l'on y voit souuent des actes en toutes les facultez, sans que jamais aucun de Messieurs du Parlement ait pretendu d'y assister, comme à des assemblées politiques : Car qu'y a-t'il d'Ecclesiastique si les disputes de la plus profonde Theologie, traitées par des Ecclesiastiques, dans vne eglise, vn jour de feste, passent pour actions politiques ; Que si quelquesfois on y a traité des questions suspectes à l'Estat, & que le Parlement y ait interposé son autorité, il en a ordonné dans le Palais, sur les plaintes des Procureurs generaux, & non dans les Escholes, comme conseruateur des loix de l'Estat, & non comme Iuge de la doctrine, ou des disputes.

Et pour monstrier que les Prelats (qui estoient en ces disputes en nombre suffisant pour faire vn Concile) sont juges des questions de doctrine, & particulièrement de la Theologie, & non pas Messieurs du Parlement ; Il n'est pas besoin de traiter la question, si les personnes laïques peuuent juger des matieres de la foy : Car faisans tous profession de la Religion Catholique, Apostolique, & Romaine, ce seroit leur faire tort de leur prouuer vne verité, qu'aucun Catholique ne nie, quoy qu'il ait échappé

*Belarm. lib. 3. de Verb.
Desinterpret. & lib. 2.
de Clericu.*

à leur Aduocat d'escrire , *Queles Docteurs Regents en Medecine, en Droit, ou aux Arts, ont mesme faculté que les Prelats, pour juger de la verité des assertions en Theologie* ; qui est vne proposition condamnée par l'Eglise: Mais pour ce qu'il a plus de besoin en cela d'estre instruit, que conuaincu , il suffira de luy dire que Messieurs du Parlement sont d'autre creance ; car par la profession de foy qu'ils font tous , quand ils sont receus en leurs charges ; Ils recognoissent que, *Si aucune chose des saintes Escritures vient en controuerse, ou doute, à l'Eglise appartient d'en définir ou determiner.* Or en ces déterminations, personne n'a voix deliberatiue que les Euesques, Ils en sont donc juges seuls ; aussi saint

Episcoporum ministerij est de dogmatibus iudicare. Bern. ep. 183.

Symmachus Papa, ad Cesarium Arelatensem.

Vigilius Papa ad Auxanium Arelatensem.

Gregorius magnus, ad Episc. Gallia.

Bernard dit , *que c'est du ministere des Euesques de juger des dogmes* ; Les Papes l'enseignent ainsi, & tous les Catholiques le croient.

Les questions qui se traittoient en ces disputes, pouuoient fournir des occasions à l'Archeuesque d'interposer son autorité: Car vn Religieux Espagnol auoit proposé de soustenir tout ce qu'a ~~un~~ escrit saint Thomas , & par consequent son opinion touchant la Conception de la Vierge; Et vn François auoit proposé la matiere *de auxilijs gratiæ* , qui sont deux disputes sur lesquelles il y a de grands ordres de Religieux, & quantité de Docteurs seculiers, qui

qui soustienent des opinions differentes, avec beaucoup de ferueur; sorte que pour empêcher le schisme qui pourroit naistre, si les vns condamnoient les opinions des autres; les Papes ont mis des limites, lesquelles il n'est pas loisible de passer en ces matieres: & particulièrement ils ont deffendu aux vns de condamner, ou qualifier, les assertions des autres.

Sixtus 4. eius Bullam renouat Concilium Tridentinum. Pius 5. an. 1570. in Bulla super speculam.

Que si dans la chaleur des disputes, on eust passé les bornes d'un costé ou d'autre, qui est-ce qui eust peu imposer silence, & arrester la contention? ce n'eust pas esté Messieurs du Parlement, qui ne s'estudient pas d'ordinaire à ces matieres: mais c'eust esté l'Archeuesque, auquel la Bulle du Pape Paul cinquiesme attribue le pouuoir & auctorité de proceder contre tous ceux qui y contreuiendront, exempts & non exempts; ce qu'il ne pourroit pas faire estant placé après aucun des Messieurs de la Cour, representans le Parlement; car lors il ne peut parler que par la bouche de celuy qui le preside, & n'a auctorité que celle qui est commune à tout le corps: partant pour vser de l'auctorité qu'il a, tant à cause de son caractere, que comme delegué du S. Siege, il est obligé de ne se pas ranger après aucun de Messieurs de la Cour.

In Bulla Regi pacifici ad ista anno 1616.

Pour l'ordre des salutations, le premier iour des disputes, les professeurs de l'Vniuersité, qui

ſçaient leurs anciennes couſtumes, ſaluerent les Prelats, auant qu'aucun de Meſſieurs de la Cour. Monsieur le premier Preſident qui n'y eſtoit pas, l'ayant ſceu, s'en offença, & manda quelques vns des principaux de l'Vniuerſité, en ſon logis, qui luy dirent, que c'eſtoit l'ancien ordre, & offrirent de monſtrer des prefaces, faites par leurs predeceſſeurs, eſquelles feu Monsieur le Cardinal de Ioyeuſe, lors Archeueſque, eſtoit ſalué ſeul, en preſence de Meſſieurs du Parlement; Voulant d'auantage s'eclaircir ſur ceſt ordre, Monsieur de la Terraiſſe Conſeiller, luy dit, que feu Monsieur le Cardinal de Ioyeuſe, s'eſtant trouué à ſes diſputes, lors qu'il paſſa Docteur, il le ſalua, ſuiuant la ſeance qu'il auoit, deuant Meſſieurs du Parlement; qui ne luy defferoient pas en cela comme Cardinal, car leurs regiſtres portent, que la Cour, l'accueilleit *comme Archeueſque*: mais ſuiuant l'ordre de l'Egliſe, lequel quand on voudra changer, il faudra reformer tous les Proſnes, & meſmes le Canon de la Meſſe, où l'on recommande l'Eueſque deuant que le Roy.

*Arreſt du Parlement
du 3. Ianuier 1590.*

Aux Sermons les Predicateurs ſont obligez de ſaluer les Archeueſques & Eueſques, deſquels ils reçoient la benediſtion, & bien ſouuent la miſſion; & la bien-ſeance veut qu'ils leur faſſent quelque apoſtrophe, & diſent quelque

chose, tant pour fomentier la creance que le peuple doit auoir en eux, que pour monstrier qu'ils sont les Docteurs de l'Eglise, desquels la chaire est marque d'auctorité, de iurisdiction & de doctrine; ainsi nous voyons dans vne diction du Rethour, *Ennodius*, faite pour l'Euesque de Nouarre, qu'il recommande l'Archeuesque de Milan, qui s'estoit trouué present. Sainct Gregoire de Nazianze à rendu ce respect à S. Basile Euesque, toutes & quantes fois qu'il s'est trouué en ses Sermons, comme nous le voyons en trois ou quatre de ses oraisons. *Sidonius* Euesque de Clermont, vfa de ceste mesme ciuilité en vn Sermon qu'il fit à Bourges, sur l'eslection de l'Archeuesque *Simplicius*. S. Chrisostome, S. Augustin, Pierre Chrisologue, & quasi tous les grands Predicateurs de l'Eglise, ont rendu cest honneur aux Euesques, lequel on n'a iamais deferé aux Presidents.

*Euseb. Emis. interpre-
tans, Ea Verba Matth.
23. super Cathedram
Mosis.*

*Concil. Ephes. part. 3. c.
32. Et 33. ubi referuntur
duo homines vna Pauli
Emis. altera Cyrilli.*

Les Docteurs & les Escoliers sont obligez de rendre ce mesme honneur aux Euesques qui se treuuent à leurs disputes, & de les saluer come ceux qui tiennent les chaires de doctrine, qui sont les chefs des Vniuersitez, directeurs des estudes, qui donnent le bonnet & les degres, comme il sera monstrier cy après; c'est pourquoy on ne doit pas enuier à l'Archeuesque, d'estre salué le premier, puis que cet honneur est deu à

*Constit. Apostol. lib. 2.
c. 26. ὁ ἐπίσκοπος πρῶτος
οὐ φ' ἁπλῶς, &c.*

sa chaire, lequel n'est rendu à Messieurs du Parlement, que par ciuilité, & que l'ordre des salutations, suit l'ordre des seances, ausquelles l'Archeuesque & tous les Prelats qui se trouuent avec luy, doiuent preceder Monsieur le premier President & autres du Parlement par tout, hors les assemblées, esquelles ils n'ont entrée qu'en qualité de Conseillers, comme il sera deormais preuue.

Les Archeuesques & Euesques sont appellés Prelats, & en Latin, *Antistites*, qui sont noms de preface: & la qualité qu'ils portent de mediateurs entre Dieu & les hommes, leur doit doner quelque préeminence pardessus les hommes, desquels Dieu les distingue & separe. Les Payens rendoient à leurs Pontifes la mesme veneration qu'aux Dieux qu'ils adoroient; & les Empereurs ne pensoient pas pouuoir estre suffisamment honorez du peuple, s'ils ne joignoient la tyare, à leur diademe, & le sacerdoce, à l'Empire; Les Chrestiens dans la recognoissance du vray Dieu, ont plutost augmenté que diminué, l'honneur deu à ses ministres. Et la France qui a surpassé toutes les autres nations en pieté, a aussi deféré dauantage aux Ecclesiastiques; c'est pourquoy ceste question y reçoit moins de difficulté, qu'en tout autre pays du monde, où elle n'est pas mise en controuerse;

car

Iud. Pel. li. 3. ep. 20.

τῆς βίβης ἐν τῆς ἀνθρώπων
πίστεως οὐσίας ἡ ἱερωσύνη
ἐστὶν μακροχρόνιον.

Matth. 16.

Artemidor. ἀρετῆς τῆς
αὐτῆς, πῶς θεοῖς παρὰ
ἀνθρώποις τιμωμένοι
πῶς, ὡς βασιλεῖς.

car si on regarde l'Ordre, le Clergé constitue le premier en cest estat, comme faisoient les Druides deuant que la lumiere de la foy eust esclairé nos anciens Gaulois; si on regarde la dignité, les Interpretes du droict les preferent aux Presidents des Prouinces, qui estoient chefs de la Iustice & des armes tout ensemble, & disent qu'ils sont preferez à toutes les dignitez de leur Diocese, pource que la leur est la plus excellente & le sommet de toutes les autres. Celle des Presidents est tres-grande, mais celle des Euesques l'est encores dauantage. Vn bon Docteur à creu que Dauid auoit monstre leur preeminence, quand parlant de ceux qui annoncent la paix au peuple, comme font les Euesques en leurs sacrifices, & de ceux qui rendent la iustice, qui est la fonction des Magistrats; il compare ceux-cy, à des colines, & ceux-là, à des Montagnes, *Subscipiant montes pacem populo & colles iustitiam.* Les premiers Presidents prennent le tiltre de Cheualiers, & les Euesques precedent tous les Cheualiers, mesmes ceux des ordres du Roy; Si on regarde les fonctions; comme les Euesques, Cardinaux, & Princes du sang, cedent aux Presidents, dās le Parlement, & en la principale fonction de leur charge: les Presidents ne doiuent pas faire difficulte de ceder aux Ecclesiastiques dans la leur; veu que c'est la plus noble qui

S. Chrsost. lib. 3. du Sacerdoce, montre combien la dignité des Prelats, est au dessus, de celle des Iuges.

Synodi 6. in Trullo Can. 7. τῶν κτ' τὴν πόσιν αἰξινύτων, κρητὴν τὰ πνευματικὰ ἐμπαιθε.

Gregor. Magn. ad Syagriū. Augustod. Pfal. 71.

Synodus 8. generalis Constantie. op. can. 14. sub Hadriano. 2.

s'exerce sur la terre.

Il ne se trouue pas que iamais les Presidents ou Officiers de nos Roys, ayent eu ou pretendu la preface par dessus les Prelats. Du Tillet qui estoit greffier du premier Parlement de France, à fait vn recueil des rangs des Ecclesiastiques, où il rapporte vne nuée de preuues de leurs prerogatiues, sous les trois races de nos Roys: auxquelles on peut adjoûter ; que tant s'en faut que leurs officiers ayent iamais peu precéder les Euesques, que par le premier Canon du Concile de Troye, auquel, avec le Pape Iean huitiesme, assista le Roy Louys le begue, il leur est defendu de s'asseoir en leur presence, s'il ne leur est ordonné, *ut episcopi, cum omni reuerentia, à cunctis mundi potestatibus debitè honorentur, atque coram eis sedere nulla tenus audeant, nisi illis præcipientibus.* Constantin le grand, auoit vsé de ceste ciuilité, au Concile de Nicée, où il ne voulut pas s'asseoir qu'en vn siege plus bas que celui des Euesques, & après y auoir esté inuité par eux.

*Euseb. in Vita Constantini.
Theoderet. us.*

Nous voyons dans les capitulaires de nos Roys, que par tout où ils parlent des euesques & des Comtes, & autres leurs officiers, mesmes des Gouverneurs & Grands du Royaume, ils nomment tousiours les euesques premiers, & apres eux les Comtes & autres grands officiers.

et en vn privilege accordé par Henry Roy d'Angleterre aux Rochelois, nous lifons cette foufcription, *Vvill. Coenomanensi, Stephano Rhedonensi*, (il faut ainfi lire, non pas *Senefcallo Londonensi*) *Episcopis, Richardo filio Regis &c.* On vçoit que les euesques fignoient deuant que le fils du Roy. Le Roy Charles VI. eftant à Tholofe, & donnant à difner au Comte de Foix, *Froiffart*, qui eftoit prefent à ce feftin, re-
 marque qu'à table fut au premier chef l'Archeuefque de Tholofe; puis le Roy, puis fon oncle le Duc de Bourbon, puis le Comte de Foix, &c. Que fi l'Archeuefque & les euesques font nommez ou affis deuant les Roys où leurs fils, en des aétions politiques ou feculieres, à plus forte raifon ils doiuent auoir la prefeance pardefus les Prefidents, aux aétions ecclefiastiques, & qui font de leur foin pastoral, comme font les proceffions, difputes, aflemblées d'hofpitaux, & autres.

Et bien que le Conneftable & le Chancelier ayent commencé fous la troifieme race de nos Roys, d'efre nommés au reply des lettres patentes deuant les Prelats, qui auparauant auoient toufiours precedé, comme remarque du Tillet, cela ne porte point de confequence pour les aétions ecclefiastiques: car feu Monsieur le Chancelier de Syllery, & feu Monsieur le pre-

mier President de Verdun, assistans au Conuent des Peres Iacobins au fauxbourg saint Honoré, lors que F. Dominique du Nant y receut l'habit, qui fut le Dimanche neufiesme jour du mois de May mil six cens vingt-vn, ils y prindrent seance apres Monsieur l'Euesque d'Auxerre, lors Euesque de Cōminge. Et ledit sieur Chancelier de Syllery festant trouué aux obseques de feu Monsieur du Vair Garde des seaux de France, qui furent faites en l'Eglise des Bernardins, au mois d'Aoult de l'année mil six cens vingt-vn; Il ne fit pas difficulté de ceder l'honneur de conduire le deuil, & celuy de la presence, dans l'Eglise, à Monsieur l'Euesque de Perigueux, & audit sieur Euesque d'Auxerre: recognoissans que c'estoit des actions & assemblées Ecclesiastiques; On ne peut pas soupçonner ces personnages, d'auoir ignoré leur rang, ou abandonné leur dignité.

Cet aduantage qu'ont eu les Connestables, & les Chanceliers sous la troisieme race de nos Rois, ne peut aussi estre tiré en consequence, pour ceux qui leur sont inferieurs entre les grands Officiers; & beaucoup moins pour ceux qui ne sont pas grands Officiers, & qui n'ont point de rang parmy eux: Car ce qu'escriit le mesme du Tillet, au Chapitre des Gouverneurs & Lieutenants generaux, est grandement considera-

siderable ; *En ce Royaume, dit-il, ne sont comptés*
rangs, que des Princes, Cardinaux, Ducs, Prelats,
grands Officiers, Gouverneurs de Prouince, Mar-
quis, & Comtes ; Il ne parle pas des Presidents,
ny des Cheualiers, qui est le tiltre qu'ils prennét
par où l'on voit qu'ils n'ôt point de rāg hors de
leur siege & tribunal. Aussi le mesme auteur
resout absolument, que les Cheualiers (qui
sont au plus bas degre de la haute Noblesse)
n'ont point de rang estably. Ce qu'un bon lu-
risconsulte, fauorable à sa robbe, qui a escrit de-
puis peu, recognoist ; & l'explique des rangs
qui sont parmy les grands, entre lesquels, les
Prelats tiennent des premiers. Si bien qu'il y a
plusieurs ordres entre le rang des Euesques, &
celuy des Presidents.

L'issue des ordres.

Personne n'ignore le rang que tiennent les
Prelats, aux assemblées des États & des nota-
bles, ne celuy qu'y ont les Presidents, & eux
mesmes en tous les Parlements, sçauent tres-
bien le rang qu'ils doiuent auoir, & le gardent
sans contention, si ce n'est à Tholose, ou depuis
prés de six vingtsans, l'on n'a point veu d'Ar-
cheuesque qui ne fut Cardinal, & l'employ
qu'ils ont eu dans les affaires publiques, ne leur
à guiere permis de resider, si bien que la memo-
ire des deferences qui leur ont esté rendues, sem-
ble estre perduë, & on veut que ce dont les

preuues restent, soit attribué aux éminentes qualitez qui estoient en eux, quoy que les Arrests de la Cour, qui en font mention, portent, que ces deferences leur sont rendues, comme Archeuesques, & que la dignité ne reçoie aucun dechet ou augmentation, par la difference des merites & qualitez des personnes. Vn ancien Euesque disoit d'un illustre predecesseur, & de ses successeurs inégaux. *Quod illi concessum est pro actuum luce ad illos pertinet,* (al. conuersationis) *quos par consecrationis splendor illuminat, & si defunct bona acquisita per meritum, sufficiunt que à loci prædecessore præstantur.* Aux honneurs extérieurs, on ne regarde pas le merite des personnes: mais leur office, & leur caractère.

Que si toute la haute Noblesse, & mesme les Prelats, cedoient à Messieurs les Presidents de Tholose, cela ne leur donneroit point d'auantage contre leur Archeuesque, dans son Diocèse. Car il ne va en aucune assemblée, qu'avec le Rochet & le Camail, ou avec la Chappe pontificale, la Croix estant portée deuant luy: s'il se rencontre avec vn President, il faut que le President marche deuant la Croix, ou entre la Croix & l'Archeuesque, ou après; s'il marchoit deuant la Croix, il tourneroit le dos au Crucifix; si entre la Croix & l'Archeuesque, on porteroit la Croix deuant vn President, l'un & l'autre.

Ennodius Ticinensis.

(al. conuersationis)

*Sauet. Ambros. de iis
qui myster. insistantur,
nō merita personarum
consideres, sed officia
sacerdotum.*

*a. l. ext. & lit. pendent.
c. antiqua §. Domini-
ca. ext. de priuileg. Ce-
rimoniale Episcop.*

tre seroit indecent ; Il faut donc qu'il marche après l'Archeuesque.

On dit qu'un Duc de Venise, voyant que son pere, qui estoit Sénateur, ne luy vouloit pas ceder, se resolut de porter tousiours avec soy vn Crucifix ; auquel le pere ne fit pas difficulté de rendre l'honneur, qu'il n'auoit pas voulu deferrer à son fils. Si ceux qui ne peuuent se resoudre de ceder à la dignité de l'Archeuesque, cedoient au moins à la Croix, qui est portée deuant luy, ils contenteroient leur opinion, & le public tout ensemble.

Messieurs du Parlement ne font pas difficulté, de se soumettre en tous lieux, pour recevoir les benedictions de leur pasteur ; & nos liures s'ont pleins de rapports, des graces que Dieu a departy aux personnes deuotes, par semblables soumissions, lesquelles portent vne reconnaissance de superiorité ; puis que, comme dit saint Paul, *Sine ulla contradictione, minor Ad Hebr. 7.*
à meliore benedicatur.

Le Roy mesme ne reçoit l'encensement qu'après l'Euesque, dans son Eglise ; & vn Patriarche, ou vn Primat, cede à vn Euesque dans son Diocese. Aussi du Tillet remarque, qu'encore que les Gouverneurs des provinces, prennent séance au Parlement deuant les Euesques, neantmoins celuy de Paris ne voulut pas ceder

*Sozom. Tis iiquousas
omnium tñ βασιλίσ
ου, μάλλον μὲν ὅτι ἐν
τοῖς ἱεροῖς, ἢ τὰ σέκτα
ἰχθῦσι.*

*Paru Crassus de Cere-
monia, Cardm. & Epi-
scopatuum c. 4.*

à l'Admiral de Chastillon Gouverneur de Paris, disant, qu'il estoit en son Diocèse ; & que comme Euefque de Paris, il estoit Cōseiller nay au Parlement, ce que n'estoit le Gouverneur.

Ἐπίσκοπος ἀπεβύτη
 τοῦ ἱεροῦ, ὡς καὶ ἀξία
 τῆς τιμῆς. *Constit. A-*
post. lib. 2. c. 26.

Messieurs les Presidents de la Cour, qui estoient le premier iour des disputes, aux Iacobins, sçauoient bien leur rang, & ne trouuerent pas mauuais, que l'Archeuesque fut salüé le premier, par les Docteurs; & qu'il fust en ordre de seance séparé d'eux, sçachans bien qu'il les deuoit precéder; & Monsieur le Prince leur donna vn bon enseignement sur ce sujet, qui dit; Qu'encore qu'il ne leur cedast en aucun endroit, hors le principal exercice de leur charge, qu'il donnoit la preface à tous les Euefques de France dans leur Diocèse, estans en l'habit de leur dignité; & qu'il donneroit la preface à l'Archeuesque aux disputes, & actions de l'Vniuersité; & la voulut donner au General des Iacobins, pour faire cognoistre à vn chacun, combien ses sentiments estoient differents de ceux de Monsieur le premier President.

Il sçait que les Rois, les Princes, & les Parlements, sont d'autant plus honorez, qu'ils deferent aux officiers de celuy qui donne l'autorité aux Rois, & imprime les sentiments d'obeissance, & de subjection, dans les cœurs de leurs sujets.

Le

Le lieu de pere, & de pasteur, quel Arche-
uesque tient (quoy qu'indigne) dans son Dio-
cese, à ceux qui par vne grace particuliere de
Dieu, sont enfans, & brebis del'Eglise : & la
presence de la diuinité, qu'il porte avec soy,
comme dit saint Gregoire le grand, fait qu'au-
cune personne laïque, de quelque qualité qu'
elle puisse estre, ne sera iamais moins estimée
pour deferer à sa dignité; & la qualité que Dieu
luy donne, de son Ambassadeur, ne permet pas
qu'il quitte son rang, & rauale l'honneur du
Maistre qu'il represente, auquel se rapportent
les respects qui sont rendus à son caractère. Ale-
xandre le grand, quoy qu'il fust payen, rendit
vne espece d'adoration au Pontife des Iuifs, &
dit à ceux qui s'en étonnoient, qu'il auoit adoré
en la personne du Pontife, le Dieu duquel il
estoit Sacrificateur: Car il ne faut point douter
que ces honneurs, qui sont rendus aux Eccle-
siastiques, ne seruent à cōseruer dans les esprits
des hommes, la veneration qui est deuë à la re-
ligion, comme leur mépris à tousiours esté sui-
uy des heresies, & des impietez. Aussi Dieu
prend sur soy les rebuts, & les injures qu'ils re-
çoient, les compare à l'idolatrie, & les punit
souuent avec les mesmes fleaux de son cour-
roux & de son indignation. Ce que les anciens
poëtes ont recogneu, quand ils ont rapporté la

*S. Aug. in Ps. 44.
Cōfess. Apostol. 3. 2. c. 26.*

In Ezechielem.

*Paul. 2. ad Corinth. pro
Christo legatione fun-
gimur.*

*Isido. Pelus. lib. 1. ep. 136.
ὁ ἱεροσολιμῶν ἐπίσκοπος
τὸ χρεῖν, τὸ ἐξ ἡμῶν ἐκτελεῖ
πλῆν, &c.*

*Ambrosiad. ep. 1. ad Co-
rinth. c. 2. can. mulier 33.
q. 5. can. Sitr. 17. dist. Epi-
scopus, in qualibet re,
sua attendere loca de-
cernimus, & suorum
sibi prerogatiuam ordi-
num cōdicare.*

Ioseph. antiq. Iud. lib. 11.

*S. Cyprian. l. 4. ep. 9. Inde
schismata & hereses
oborta sunt & oriuntur
dñ Episcopus qui vnus
est & Ecclesia praeest
superba quorundā pra-
sumptione contemni-
tur, &c.*

*Leuit. 26. Osee. 4. Eze-
chiel. 5.*

Hom.

*ὁ λαὸς τοῦ θεοῦ ὁ ἴδιος
τοῦ χριστοῦ ἡ παρουσία
ἐστὶν ἐν αὐτοῖς.*

cause de la grande maladie qui rauagea le camp des Grecs , au mauuais traitement qu'un prestre auoit receu, des officiers de leur armée.

On n'a iamais veu qu'aucun premier ou autre president du Parlement de Paris , qui est celui des Pairs , & le premier de France , ait precedé aucun Euesque , soit aux disputes de l'Vniuersité , aux seances dans les Eglises, ou en l'ordre des processions, baptêmes, ou enterrements, soit en aucune assemblée publique, ou particuliere , hors les fonctions de sa charge, bien e sloignez d'entreprendre de faire quitter vne place prise, à Monsieur l'Archeuesque de Paris leur pasteur; d'un nombre infiny d'exemples de telles deferences, qui se pourroient rapporter, il y en a deux, desquels la memoire est fraische, & la notice publique.

Le premier arriua en l'année mil six cens dix-neuf, au College de Clermont, où Monsieur le Cardinal de Sauoye s'estant trouué à des disputes de Theologie , & Monsieur l'Euesque d'Orléas, & plusieurs Euesques avec luy, Monsieur l'Escalopier President en la Cour, & quelques Maistres des Requestes, estans arriuez les premiers, auoient occupé les premieres chaires; Mais Monsieur l'Euesque de Langres estant suruenu, fit quelque demonstration avec d'autres Euesques, de ce qu'il ne trouuoit pas libre

la place deuë à sa dignité. Dequoy Monsieur le President l'Escalopier s'estant apperceu, leur quitta la place fort courtoisement, & en prit vne autre.

Le second, est du iour des Rois de l'année mil six cens vingt cinq, qui arriua aux disputes de Monsieur de Verneuil Euesque de Mets, lesquelles furent honorées de la presence du Roy. & Messieurs les Cardinaux de la Rochefoucault, & de Richelieu y furent assis près de sa Majesté, & après eux les Archeuesques & Euesques, qui y estoient en bon nombre; Messieurs du Conseil & du Parlement, & entre autres, Monsieur de Verdun premier President, furent placez derriere les Prelats, en vn autre banc, sans qu'il y eust aucune contestation. On pourroit rapporter vn nombre infiny de semblables rencontres, arriuées aux escholes de Sorbonne, en toutes lesquelles, les Presidents & Conseillers du Parlement, en quelque nombre qu'ils ayent esté, ont tousiours deféré aux Euesques la preséance: Mais ce seroit employer des preuues superflues en vne chose certaine & notoire. Feu Monsieur de Harlay, premier President au Parlement de Paris, a aussi bien sceu qu'aucun autre la grandeur de sa charge, & en a conserué les prerogatiues avec beaucoup de vigueur; il a neantmoins cedé, non seulement aux Eues-

ques , mais encor aux Abbez. Car s'estant trouué aux honneurs funebres de feu Dame Louise Bodet, veufue de feu Messire Pierre Seguier , President au Parlement, qui fut enterrée dans l'Eglise de saint André des Arcs, en l'année mil cinq cens quatre vingts quatorze , plusieurs Euesques s'estans trouuez au conuoy , ils conduisirent les premiers deuils , & après eux Monsieur l'Abbé de sainte Geneuiefue , & Monsieur le premier President de Harlay , & estant suruenu encor vn Euesque , ledit sieur premier President ne voulut iamais prendre le rang qui luy estoit offert, deuât Monsieur l'Abbé de sainte Geneuiefue, qui n'estoit pas Euesque : pour ce qu'il sçauoit , que comme les officiers d'un Prince cedent à ceux du Roy , aussi ceux du Roy ne se font iamaistort de deferer aux officiers du Dieu que le Roy mesme adore.

Que si l'Archeuesque de Tholose (comme tous les Euesques de France) precede dans Paris les Presidents de la Cour , sur lesquels il n'a auctorité ne iurisdiction quelconque , & lesquels precedent ceux de Tholose , à plus forte raison , il doit preceder les Presidents de Tholose , qui sont les Diocesains , & sur lesquels il a iurisdiction spirituelle : veu mesmes que le feu Roy Henry le Grand , de glorieuse memoire , par son Edit de l'an mil six cent six , verifié au
Par-

Parlement, a ordonné que les Archeuesques, & Euesques seront honorez & respectez, comme ils ont esté d'ancieneté; & que les rangs, & respects, seront gardez en tout le Royaume, comme ils sont à Paris, & le mesme est confirmé par l'Edict du Roy, de l'année mil six cens dix, qui est aussi verifié.

Feu Monsieur le Cardinal de Ioyeuse, Archeuesque de Tolose, y a tousiours precedé Messieurs les Presidents du Parlement, non seulement aux Eglises, ou aux disputes de Theologie, ou en celles de droict civil, qui se font dans les escoles publiques, pour prendre les degrez, (comme il a esté cy deuant remarqué, des disputes de Monsieur de la Terrasse Conseiller au Parlement): mais encor aux disputes de droict qui se faisoient pour les chaires vacantes, auxquelles Messieurs du Parlement pretendent d'auoir plus d'auctorité qu'aux autres actions de l'Vniuersité: la preuue de cette verité sera prise du sieur de la Rocheffauin, qui estoit President aux requestes du Palais à Tholose, & par consequent du corps du Parlement; on doit luy adjoûter foy, en ce qu'il rapporte d'auoir veu, contre les prerogatiues de son ordre, lesquelles il estend le plus qu'il peut; Il escrit en son liure des parlements *qu'aux assemblées qui se font dans une Eglise, où conuent, l'Archeuesque precede le*

L. 1. chap. 1. Sec. 13. n. 3. Es 4.

A a

premier President, & que le Roy Henry le Grand, l'a iugé ainsi pour Monsieur le Cardinal de Joyeuse Archeuesque, contre Monsieur le premier President de Verdun. Et bien qu'il adjouste aussi tost, que le contraire s'observe aux assemblées de l'Vniuersité; il montre luy mesme que ce n'est qu'une imagination: car il renuerse cette limitation par vn exemple qu'il rapporte au mesme endroit, en ces mots. J'ay veu, dit-il, en l'Vniuersité ou escoles du droict, aux disputes d'une Regence, respondant Cardonne Aduocat, le second de Iuin 1590. Monsieur Berterandi, second President, auoir donné l'honneur & preface, à Monsieur le Cardinal de Joyeuse.

Contre ces preuues on allegue deux choses. La premiere qu'il n'y auoit point de premier President: mais on sçait qu'en l'absence des premiers Presidents, les seconds & autres suiuaus, ont les mesmes prerogatiues que luy, & qu'ils sont tous premiers Presidents, les vns en l'absence des autres, (au moins à Tholose comme le dit sieur de la Roche le marque.) La secóde que c'estoit en temps de trouble, & que ceux qui cedoient, estoient des ligueurs & Archieuescopaux (car ce sont les mots dont on vse, faisant vn nom de faction, d'un nom de religion, par lequel l'Eglise a accoustumé de discerner ceux qui ont la communion, de ceux qui en

sont separez. S. Cyprian a dict, & apres luy *Epi. 4. lib. 9. & can. sciro 7. q. 1. & apud Iuonem in decreto.*
 toute l'Eglise, *Episcopum in Ecclesia esse, & Ecclesiam in Episcopo: & si quis cum Episcopo non sit, in Ecclesia non esse.* Et apres, *est enim Ecclesia, plebs episcopo adunata & pastori suo grex adherens.*)

Il est facile à cognoistre que cette deference a esté renduë à Monsieur le Cardinal de Ioyeuse, non pas à cause des troubles (car le malheur du temps l'eust plustost porté à rechercher Messieurs du Parlement, qu'à prendre aucun advantage sur eux) mais par ce que le droict commun, & l'usage de Tholose le vouloit ainsi; cela se voit par ce qui s'y pratiquoit deuant les troubles: car en l'année 1565. le 27. iour du mois de Mars, Monsieur le Cardinal d'Armagnac, lors Archeuesque, conuoqua en son logis les Premier, Second, & Cinquieme Presidents: trois Conseillers, & deux des Gens du Roy du Parlement, pour traicter des affaires de l'Vniuersité. En cette assemblée ledit seigneur Cardinal preceda, & presida, dans son logis, tous lesdicts Presidents & autres de la Cour, comme il sera remarqué cy apres. Et apres la paix Monsieur le Cardinal de Ioyeuse a precedé Messieurs les Presidents du Parlement, aux disputes de Droict ciuil de Monsieur de la Terrasse. Et Monsieur de Verdun ayant voulu

pretendre la preſeance ſur ledit ſieur Cardinal de Ioyeuſe, comme Archeueſque, fut blaſimé par le feu Roy, de l'auoir entrepris; par ces exemples on voit que la poſſeſſion & le droit ſont pour l'Archeueſque.

*Monsieur le Cardinal
du Perron lib. 3. de ſes
Ambaſſades. pag. 493.*

Pour l'ordre des proceſſions, en l'année mil ſix cens ſix, vn preſident qui étoit en la Chambre de l'Edict à Caſtres, entreprit de precéder Monsieur l'Eueſque à la proceſſion de la Feſte-Dieu, & la preſence du Sainct Sacrement ne le retint pas de faire quelque violence, dont il fut reprimé par le feu Roy: ſi bien que du depuis, luy & ſes ſucceſſeurs ont laiſſé libre audict ſieur Eueſque l'aſſiſtance de ſes deux Archidiaques, & la preſeance par tout. On a mis en deliberation, ſi à la Feſte-Dieu dernière, on entreprendroit la meſme choſe à Tholoſe. Et en fin le quinzième Iuin fut priſe la reſolution qui ſera icy couchée en ſes propres termes, *La Cour delibérant de la ſeance que le ſieur Archeueſque voudroit prendre, aux Proceſſions qui ſe font tous les ſoirs, dans l'Egliſe de ſainct Eſtienne, pendant l'Octau de la Feſte-Dieu, a arreſté, qu'encore que ſa place fut à fermer ſon Clergé, ſi il n'y vouloit faire le ſeruice, & ce faiſant paſſer immediatement deuant le Poiſle & ceux qui ſeroient l'office: neantmoins pour ne troubler le ſeruice diuin, & attendant que par le Roy en fuſt ordonné*

ordonné: que si il vouloit aller apres, on le laisse-
roit à sa volonté, y allant avec le Rochet & le
Surpelis & le Bonnet carré, à la charge de n'a-
voir que deux Ecclesiastiques en Surpelis, près sa
personne devant la Cour, & sans aucuns de ses
seruiteurs domestiques. Ceste resolution est pri-
se sans püyr Messieurs les Gens du Roy, &
sans en conférer avec l'Archeuesque, qui eust
fait voir, que jamais Archeuesque n'a pris place
deuant le poisle dans son Diocese: Que ceux
qui sont sous le poisle, & font l'office estans
de son Clergé, il les doit suivre & auoir l'œil
sur eux: Que ny aux processions, ny aux autres
actions, il ne doit jamais porter de surpelis, mais
y doit estre avec sa chappe pontificale, ou le Ca-
mail, ou le pluuiail, à son chois: & que en pre-
sence du S. Sacrement, il ne doit point mettre
de Bonnet carré, mais doit estre descouuert:
Que le nombre & l'habit des Ecclesiastiques
qui doiuent estre près de luy, depend de l'ordre
de l'Eglise, & non de Messieurs du parle-
ment, qui n'ont pas accoustumé de prendre
cognoissance de telles matieres. Que le parle-
ment de Roüen ayant jugé, si vn Curé deuoit
porter l'estole ou non, son Arrest fut cassé par
le Roy, & le different renuoyé pardeuant le
Iuge d'Eglise: Que de priuer l'Archeuesque
de l'assistance de ses domestiques, estoit l'obli-

*Cette clause est adjou-
stée de la main de M^{rs}
sieur le Premier Presi-
dent, & que la delibe-
ration soit toute escrüe
d'une seule main.*

*Ex ordinar. Codinur.
S. Ensebe de Samosate
allant en exil estoit sui-
uy par vn sermateur, qui
portoit son liure & son
carreau. Theodoret &
Nicephore & saint
Ambroise eust vn grand
desplaisir de ce qu'un
bon Euesque, nommé
Hyginus, estant banny
on ne luy auoit laissé
ni sacroble, ni son car-
reau. Ambros.*

ger à porter luy-mesme, tout ce qui luy est nécessaire, comme son liure, & le carreau, qui a accoustumé d'estre porté apres les Euesques, pour se mettre à genoux à toutes occasions, & duquel les plus saints & austeres ont vsc depuis plus de douze cens ans: il eust monstré, que le preuost de son Eglise par coustume ancienne a vn Gentilhomme près de soy aux processions, qui porte son lumusse, & que l'Archeuesque en doit auoir dauantage: il eust encores fait voir, qu'il n'y a pas plus d'inconuenient, qu'il aye quelques-vns de ses domestiques entre luy & Messieurs du parlement, que d'y auoir les Huissiers de la Cour lors qu'elle y est en corps, & que les Stations qui se font dans l'Eglise de saint Estienne, pendant l'Octau de la Feste Dieu, sont des offices particuliers, ausquels jamais la Cour ne s'est treuuee, & quelquefois il n'y a pas vn Conseiller: qui fait cognoistre que cette resolution est prise sans necessité. Bref, il eust fait voir que ces nouueautez contre l'usage de toutes les Eglises de France, & particulierement de celle de Tholose, alloient entierement à la destruction de la Religion. Le Concile de Trente porte en termes exprés,

*Episcopi in honor tri-
buntur qui eorum di-
gnitati par est. eisque
in choro & in capitulo
in processibus & ali-
is actionibus publicis*

Qu'on doit rendre aux Euesques l'honneur conuenable à leur qualité, & qu'au Chœur, au Chapitre, Processions, & autres actions publiques, ils

doivent auoir le premier rang, & la place qu'ils voudront choisir, & l'autorité principale, en ce qui sera à faire. Par ce decret, ils eussent veu qu'ils n'ont pas droit de prescrire à l'Archeuesque sa place; que c'est à luy à la choisir, & qu'en toutes assemblées ecclesiastiques, il a la preface, & la direction.

Non seulement l'Archeuesque, mais encor tous les Euesques, qui se trouuent avec luy, doivent preceder Messieurs les Presidents du Parlement en toutes assemblées; comme il a esté monstre, qu'en celles de l'hostel Dieu, les Euesques qui sy trouuent, se rangent près de l'Archeuesque, deuant les Presidents: & en doivent vser de mesme aux processions, & autres assemblées, & aux seances dans les Eglises: comme il fut pratiqué à Bordeaux, en l'année mil six cens vingt-vn, où s'estant fait vne procession generale, en laquelle le Parlement se trouua en corps; Il fut precedé, tant en l'ordre de marcher, qu'aux seances, par Messieurs les Euesques, qui sy trouuerent en bon nombre: n'estant pas raisonnable que les Prelats se separant les vns des autres, & quittent le rang de l'Eglise pour prendre celuy de Conseillers, en vne action Ecclesiastique: non plus que Messieurs du Parlement ne se veulent pas separer. Et quand les Euesques voudroient ceder, ou quitter leur

prima sedes. & locus quem ipsi elegerint. & precipua omnium totum agendum auctoritas. Concil. Trident. sess. 25.

Concil. Trident. sess. 25. Non potest sancta Synodus non grauius dolere audens. Episcopos aliquos, suis iam obliatos, Pontificiam dignitatem, non leuiter dehonestare, qui cum regum ministris, regulis, & baronibus in Ecclesia, & extra, indecenti quadam demissione se gerunt, & veluti inferiores ministri altaris, nimis indignè, non solum loco cedunt sed etiam, personaliter illis inferiunt. Quare hac & similia detestans sancta Synodus, sacros canones omnes, conciliaque generalia, atque alia Apostolica sanctiones, ad dignitatis Episcopali decorum, & grauitatem pertinètes renouando precepit; ut ab huiusmodi in posterum Episcopi, se abstineant, mandans eis, ut tam in Ecclesia, quàm foris suum gradum, & ordinem, pra oculis habites, ubique se patres, & pastores esse meminerint; reliquis vero

*ram Principibus, quam
ceteris omnibus, ut eos
paterno honore ac de-
bita reuerentia profe-
quantur.*

*Council. Cabilonenſe ſub
Carolo Magno. Pariſi-
ſe, ſub Ludonico Pio.
Capitul. Caroli Magni.
can. de quibuſdam 37.
diſt. tot. iiii. cxi. de
Magiſtru.*

rang en telles occasions, les Canons des Conciles ne le leur permettent pas.

Quant aux aſſemblées des Vniuerſitez & Collegés, elles ſont tellement ſous le ſoin paſtoral des Eueſques, qu'ils ne peuuent eſtre priuez de la ſur-intendance, & les prerogatiues & preſeances ne leur y peuuent eſtre conteſtees ſans vn trouble manifeſte. Car depuis que le ſoleil de juſtice a eu diſſipé les nuages du Paganisme en France, nos Conciles & les capitulaires de nos Roys ont donné cette charge aux Prelats, laquelle auoit auparauant appartenu aux Druides, comme celle des choſes ſacrées : & lors qu'on a voulu eſtablir les Vniuerſitez, les conuentions en ont eſté faites avec les Eueſques des lieux. Il y auoit d'ancienneté dans les Eglises des Echolaſtres, ou Maîtres d'Eſchole, qui prenoient le ſoin de l'inſtruction de la jeunefſe, pour les ordinaires ; & lors que les Vniuerſitez ont eſté inſtituées, ces Echolaſtres ont eſté chargés, en pluſieurs eglises, en des Chanceliers, qui ſont en ce ſoin, les Vicaires nais des Eueſques, comme les Officiaux, Penitenciers, & Theologaux, chacun en leur fonction. Le pape Innocent III. voulant monſtrer comme les Chanceliers des Vniuerſitez dependent des Eueſques, qui en ſont les chefs, eſcrit en vne de ſes epiſtres, que le Chancelier doit faire les fonctions que
ſon

son Archeuesque luy ordonne. Et vn Roy d'Aragon, seigneur de Montpellier, ayant donne permission, par lettres, à vn Docteur, de lire en Droict, le Pape Clement quatriesme luy escriuit, que ce droit appartenoit à l'Euesque, & adjoûta, *Cancellarius caput studentium, post Episcopum, in quacumque legant, vel doceant facultate, ab Episcopo ordinatur; unde idem Episcopus caput est studij principale.* Et le parlement de Tholose a bien recogneu ce pouuoir des Euesques, sur les Chanceliers des Vniuersitez, quand il a adjugé à Monsieur l'Euesque de Montpellier la sur-intendance de l'Vniuersité par dessus son Chancelier, par ses arrests des années mil six cens quinze, & mil six cens dix-neuf. Et à Paris, Aix, & autres Vniuersitez, les Doctorats se prennent, dans la salle del' Archeuesché.

*In registro Clementis
1111. M.S. ep. 305.*

Aux Estats de ce Royaume, les reglements concernans les Vniuersitez, suiuent ceux de l'Eglise, de laquelle elles dependent; à cause que l'instruction de la jeunesse, fait partie de la discipline ecclesiastique. Les Euesques sont les juges des escholiers, ils sont conserveurs des priuileges accordez par les papes aux Vniuersitez, & quand il a fallu les reformer, c'a esté des ecclesiastiques qui y ont vacqué, comme en celle de Paris, le Cardinal de saint Estienne Legat

*Monsieur de Thom en
sachant que à l'Vni-
uersité.
Matth. Paris hist. Angl.
ad an. 1229.*

*c. 1. ext. de locato.
L'ordonnance de Phi-
lippe Auguste de l'an
1200.*

*Bellesforest en ses grã-
des Annales.*

c. 2. ext. de celeb. miss.

en France, en l'année mil deux cens quinze, & les deleguez du Pape Urbain V. en l'an mil trois cens soixante six, & le Cardinal de Touthuille en l'année mil quatre cens cinquante deux. Bref les Clercs & les Escholiers ont telle connexité, que le nom de Clerc, est commun aux Escholiers, celuy d'Escholier commun aux Clercs.

*Novella Iuliani 115.
c. 35.*

Que si il y a Vniuersité aucune qui soit sous la direction des Euesques, celle de Tholose y doit estre. Guymier Conseiller au Parlement de Paris, a creu que celle de Paris estoit Ecclesiastique, à cause que la plus grande partie des Docteurs estoient Clercs, quoy qu'elle soit fondée & dottée par nos Roys, il y a plus de raison de le dire de celle de Tholose, en laquelle de dix-sept professeurs, il y en a dix pour enseigner la Theologie & le droit Canon, qui est vne science Ecclesiastique, elle est fondée pour seruir de rempart contre l'heresie, par ordonnance du Legat du saint Siege R. *Electus Portuenfis*, & par l'aduis des Prelats de la prouince, qui l'assistoient d'ordinaire: son ordonnance fut confirmée par Bulle du Pape Gregoire IX. qui porte, que ledit Legat auoit accordé à l'Vniuersité de Tholose, les priuileges, desquels iouÿssoit celle de Paris, & par vne autre Bulle du mesme Pape, il est enjoint aux Comtes & Consuls d'empescher les traittes des bleds qui pourroient enche-

rir les viures aux Escholiers, qui fait veoir le soin que l'Eglise auoit de l'Vniuersité. Le Pape lean XXII. (qui auoit enseigné le droict à Tholose) y a donné plusieurs beaux priuileges: aussi les Docteurs y sont créez *auctoritate Apostolica & Regia*, par vne benediction qu'ils reçoient sur la porte de la Chancelerie, les points de leurs leçons, ou des disputes qu'ils ont à soustenir, leur sont donnez par le Chancelier, qui est vne dignité dans l'Eglise Metropolitaine, à la collation de l'Archeuesque, ou par le Vicechancelier, qui ne peut estre qu'un Chanoine de la mesme Eglise, qui soit Docteur, les lettres sont données par le mesme Chancelier, les derniers actes pour passer Docteur, sont faits dans la Chancelerie, qui est dans ladite Eglise, ou l'on reçoit le bonnet, afin que les Docteurs sçachent qu'ils paruiennent à ce degré par la faueur du Ciel, & recognoissent que la doctrine est vn don de Dieu, & que la diuine bonté leur départ d'autant plus facilement ses graces en la profession des lettres, qu'ils en recherchent les titres & degrez près de ses autels.

Le Parlement juge bien quel Vniuersité est sous le soin & charge de l'Eglise, quand il reçoit les appellations comme d'abus, de ses decrets, & de ses eslections, comme depuis peu il en a receu vne de l'eslection, d'un professeur en

medecine, & Monsieur le President Duranty en a marqué d'autres exemples: il le juge bien quand il faut doter les Maistres ou Regents dont le fonds se prend sur l'Eglise, comme il se voit par l'institution des prebèdes preceptoriales. Que si l'Archeuesque n'auoit aucun pouuoir en la direction de l'Vniuersité, feu Monsieur de Foix, estant pourueu à Roine de l'Archeuesché de Tholose, faisoit en vain ses desseins, quand il proposoit d'auoir vn soin tres-particulier des Colleges, lors qu'il seroit en sa residence, si Dieu eust permis qu'il y fut venu.

*M. Ant. Muret, en sa
harangue funebre.*

L'Vniuersité de Tholose est dotée par les Archeuesques, ou par leur soin, ils y ont vny des benefices, desquels elle jouit encorés, & en paye les decimes comme les Ecclesiastiques, ils ont fondé des Colleges, entre autres celuy de saint Martial, dont les places sont encorés conferées par leurs successeurs. Feu Monsieur le Cardinal d'Armagnac, Archeuesqué, voyant que l'Vniuersité auoit trop peu de reuenue, obtint du Roy Charles neufiesme, permission d'imposer deux mil liures, de contribution annuelle, sur les Archeuesques, Euesques, Abbez, & autres beneficies de la prouince: & ayant eu la commission, appella avec soy le premier, second, & cinquiesme Presidents, trois Conseillers, & deux des gens du Roy, du Parlemēt,
qui

qui en firent le departement, suiuant lequel cet-
tesomme est encore payée. Le procès verbal
qui en fut fait, est de l'année 1565. du 27. iour de
Mars: par lequel on voit, que tant s'en faut, que
Messieurs du Parlement pretendissent de pre-
ceder leur Archeuesque, en ce qui concernoit
le soin de l'Vniuersité, qu'il les appelloit chez
soy, les y precedoit, & presidoit, sans contredit,
comme il a esté déjà remarqué.

Que si l'Vniuersité est sous le soin pastoral
del' Archeuesque, il y doit auoir les préeminen-
ces, comme ses predecesseurs les y ont eu, deux
cens ans auant qu'il y eust de Parlement à Tho-
lose; Que si la direction en appartenoit à la
Cour, pendant tout ce temps-là, il n'y auroit
point eu de Directeurs.

Toutes les raisons qu'on allegue au contrai-
re, sont communes aux autres Parlements, qui
nepretendent rien de semblable, & se conten-
tent, de juger des differents, qui naissent sur les
appellations des parties, ou sur les requestes des
Procureurs generaux, qui font leurs plaintes des
questions contraires à l'Estat (si aucunes y sont
traitées) & des contrauentions aux reglements
des escholes, lesquels sont faits par les Ecclesia-
stiques, publiés sous l'autorité du Roy, &
verifiés au Parlement.

Il y en a vne seule, qui semble particuliere au

Parlement de Tholose, qui est, que les points des disputes, qui se font pour les Chaires ou Regences vacantes, sont donnés par Monsieur le premier President, ou autres de la Cour : & que deux Conseillers, de sa part, assistent aux elections des Professeurs, d'où on tire vn argument de superiorité, auquel on respond; Que hors les disputes, qui se font pour les Chaires vacantes; pour tous les autres actes de l'Vniuersité, & en toutes les facultez, le Chancelier donne les points, il donne aussi les lettres de Docteur, qui est vn droit plus grand que de donner les points, comme le Parlement mesme l'a jugé : Car au procez d'entre Monsieur l'Euesque de Montpellier, & le Chancelier, & autres officiers de son Vniuersité; la Cour ordonna par son arrest de l'année mil six cens quinze, que le Chancelier donneroit les points, mesmes pour les disputes des Chaires vacantes, & que l'Euesque en donneroit les lettres : Si bien que le Parlement fait en cette occasion, ce que le Chancelier feroit en l'Vniuersité de Montpellier, lequel a pardessus soy, l'Euesque qui donne les lettres.

Le Parlement donne ces points, pour faire obseruer sans fraude l'Ordonnance, qui veut que les Chaires vacantes soient disputées, étendant jusques-là l'autorité, que le Roy interpo-

se , à ce que la discipline Ecclesiastique soit maintenuë & obseruée : Mais la Cour , en donnant ces points , n'entend pas de restreindre l'autorité de l'Archeuesque, ne de prédre le regime de l'Vniuersité : car ils sont donnez à l'ouuerture du liure , & publiez , non par le Greffier de la Cour , mais par le Scribe de l'Vniuersité , en presence du Recteur , & des anciens Professeurs , qui jugent si la matiere qui eschet , est disputable , sans que Messieurs du Parlement en deliberent ou ordonnent. Et aux eslections des Professeurs , le Recteur preside & precede les Commissaires de la Cour , qui n'y ont qu'assistance muete , il recueille les suffrages , & de sa voix & de sa main crée le Professeur ; Que s'il y a quelque contrauention aux reglements , les Commissaires en font procez verbal , & le rapportent à la Cour . Mais cette assistance ne leur donne aucune superiorité , non plus que lors que les eslections des dignitez de l'Eglise estoient en vsage , les Commissaires qui y assistoient de la part de nos Rois , n'estoient pas superieurs de l'Eglise , ou des Euesques.

Et si Messieurs du Parlemēt ont donné d'office , & sans dispute , des chaires de professeurs à des Conseillers de la Cour , comme ils alleguent , c'est contre les Ordonnances , & ne peut

estre tiré à consequence, non plus que l'autorité, de laquelle ils vsoient cy deuant, de casser les élections des Capitoux, & d'en nommer d'autres d'office, laquelle le Roy a jugé contraire aux droits de la maison de ville.

Que si ils auoient entrepris plus que de raison, pendant les longues absences des Archeuesques, il seroit encore temps de s'en plaindre, puis que les prescriptions ne courent pas contre l'Eglise non deffenduë.

Mais, quelques prerogatiues que puissent pretendre Messieurs du Parlement dans l'Vniuersité, ils n'y ont jamais eu la prescence sur les Archeuesques, desquels ceux qui ont residé depuis six vingts ans, ont tous esté Cardinaux, qui ne leur ont pas cedé, ny peu ceder. Cela estant, comment peuuent-ils dire qu'ils sont en possession? que si ils n'ont pas la possession, & que le droit soit contre eux, sur quoy peuuent-ils fonder leurs pretentions?

LE DERNIER DIFFERENT, est pour la Croix; & c'est vn malheur pour l'Archeuesque, que cette marque de la passion de Iesus-Christ, laquelle par sa prescence a souuent appaisé les émotions, & réuni les esprits diuisez; ayt maintenant vn effet contraire.

*Paul. Diacon. Ado. in
Chron. Bedæ. Anastas.
Biblioth.*

*ca. antiqua. ext. de pri-
uileg.*

Cette enseigne de nostre redéption, est toujours portée deuant le Pape, & deuant les Patriar-

triar-

triarches, en tous les endroits du monde, mesmes hors les limites de leur patriarchat; les Archeuesques la font porter dans l'étenduë de leur prouince, en tous lieux, exempts, & non exempts, comme il est porté par vn Canon du Concile de Vienne, tenu sous le Pape Clement cinquième: qui monstre que la Croix n'est pas marque de jurisdiction.

*Clem. Archiepiscopo
de priuil.*

Que si l'Archeuesque peut faire porter sa Croix es lieux exempts de sa jurisdiction, il la peut bien faire porter en la Chappelle du palais, qui n'en est pas exempte: Car par le droit commun, toutes les Eglises, Chappelles, ou oratoires qui sont dans l'étenduë d'un Diocese, sont sous la puissance & autorité de l'Euesque, comme il est porté par les anciens Conciles de l'Eglise, renouellez en celuy d'Orleans, qui a esté receu pour vne regle generale: Aussi ne peut-on dresser vn autel sans sa permission, ny le dedier ou consacrer, sans luy, ou sans son ordre. Que si on a quelque tiltre, qui exempte de la loy commune de l'Eglise, il en faut donner cognoissance; si on n'en a point, on ne doit pas s'offencer, quand l'Archeuesque dit ses droits.

*Can. omnes. 16. q. 7. omnes
Basilica, qua per
diuersa loca constructa
sunt, vel quousque con-
struuntur, placuit secun-
dum priorum canonum
regula, Et in eius Epis-
copi potestate consistat,
in cuius territorio po-
sita sunt.*

Car il est certain que la Chappelle est sujette à sa visite, qu'il y peut dire la Messe, avec sa Croix, & autres marques de sa dignité: & que

E c

personne ne l'y peut dire que par sa permission, avec laquelle Messieurs les Euesques y donnēt la bēdiction solennele, & officient pontificalement avec la crosse.

Il est encores certain, que tous Messieurs les Presidents, Conseillers, & officiers du Parlement, sont subjets à la iurisdiction de l'Archeuesque, non comme officiers, mais comme Chrestiens & enfans de l'Eglise, qui sont des qualitez qu'ils ne quittent pas dans le Palais, ils prennent à toute occasion des dispenses de luy, sont absoubs de leurs fautes par luy, ou par ceux qu'il commet; Et suiuant les regles des Iuriconsultes, celuy qui les peut absoudre, les peut condamner; & celuy qui les peut deslier, les peut aussi lier. Le lieu donc & les personnes estans sous sa Iurisdiction, il n'y a raison quelconque d'empescher qu'il ne fasse porter sa croix iusques à ladite chapelle, comme ont tousiours faict ses predecesseurs, veu que c'est le lieu où Messieurs du Parlement recognoissent qu'elle doit reposer, pendant qu'il est à l'audience ou au Conseil.

*nemo qui condemnare
potest, Absolvere non po-
test l. 37. nemo ff. de reg.
iur.*

*Guill. Nenkrig. de rebur
Anglicis lib. 2. c. 16.*

Nous lisons dans l'histoire d'Angleterre, que Sainct Thomas de Cantorbie, allant deffendre sa cause, portoit luy mesme sa croix dans le Palais, laquelle en autres occasions estoit portée par son aumosnier, *curiam ingressus est Thomas*

crucem argenteam, ante se portari solitam, propria manu bajulans, nec alium in illo conuentu publico, crucis bajulum, quamtumcunque rogatus, admisit, lors la croix estoit bien receuë par tout, mesmes au lieu ou la Iustice souueraine s'exerceoit.

Feu Monsieur Hurault de l'hospital Archeuesque d'Aix, allant au Palais & faisant porter sa croix, iusques dans la chambre du Conseil, y receut quelque empeschement de la part du Procureur general, qui soustint qu'elle ne deuoit estre portée que iusques en la chapelle, ou elle deuït demeurer, la plainte en fut faite au Roy, qui ordonna que le Procureur general viendroit rendre raison de cest empeschement. Le Parlement, desirant d'arrester ceste procedure, deputa vers sa Majesté, Monsieur du Vair, lors premier President, pour tascher de descharger ledit Procureur general de ce decret, la harangue qu'il fit sur ce sujet est imprimée, de laquelle il seroit tres facile de refuter les raisons, si l'Archeuesquen'estoit resolu de se contenter des offres, que faisoit ledit sieur premier President du Vair, pour le Procureur general; qui sont, que la Croix soit portée iusques à la chapelle du Palais, ce qui est d'autant plus raisonnable que tous les Archeuesques de Tholose en ont tousiours vsé ainsi, comme la deposition de plusieurs personnes dignes de

*à la fin de la dernière
édition de ses annes.*

foy, qui l'ont veu, en est vn tesmoignage certain; & il n'y a pas vn de Messieurs de la Cour dans la salle, ou est la chapelle, lors que l'Archeuesque y va: qui fait voir que la difficulté qu'on y apporte est affectée.

Aussi bien que la nouveauté qu'on a voulu apporter à sa reception, en la qualité de Conseiller nay au Parlement, luy faisant faire serment à la Cour, & profession de foy, contre la teneur des lettres, par lesquelles le Roy Charles neufiesme accorda ceste qualité à feu Monsieur le Cardinal d'Armagnac, Archeuesque de Tholose, pour luy & ses successeurs, lesquelles ne portent aucune charge de prester sermēt, encores moins de faire profession de foy, & il fut receu sans en faire; les lettres ayant esté purement & simplement verifiées & enregistrées, ses successeurs n'en ont point fait, & ont esté receus, comme l'a esté Monsieur l'Archeuesque de Paris au Parlement, & comme le sont les Princes du sang, les Pairs de France, les Gouverneurs, & tous les Conseillers nays, aux autres Parlements, & ce d'autant que les Archeuesques & Euesques font serment de fidelité au Roy, pour leur dignité, & pour tout ce qui en depend. Et font la profession de foy, qu'ils enuoyent au Pape, deuant que d'estre proposez, & la repetent quand ils sont sacrez; il est fort indecent que
Mef

Messieurs du Parlement, exigent vne profession de foy de leur Archeuesque, auquel ils doiuent rendre raison de la leur.

Par ces moyens le Roy iugera, que Monsieur le premier President & autres du Parlement, sont mal fôdez en leurs entreprises. Et leur fera defences, s'il luy plait, d'occuper la premiere chaire à main gauche, du siege Archiepiscopal, affectée au grand Archidiaque, ou autre tenant sa place, pour assister l'Archeuesque dans l'Eglise de Tholose, soit qu'il officie, ou qu'il n'officie pas. Et de le troubler en la possession de conuoquer les assemblées de l'hostel Dieu, & y faire tous actes de President, les precéder aux disputes & ouuertes des leçons, qui se font aux escholes de l'Vniuersité, ou autres lieux dudit Tholose. Et aux enterrements, Baptêmes & assemblées publiques, ou particulieres, generalement quelconques, hors du parlement. Et ordonner, que les autres Euesques qui se trouueront avec ledit Archeuesque, pourront prendre place & rang prés de luy, sans qu'aucun President ou Conseiller, puisse interrompre leur ordre. Qu'aux processions, ledit Archeuesque estant après le poëlle, pourra auoir au tour de foy, les officiers & seruiteurs qu'il iugera luy estre necessaires pour l'ordre de l'Eglise, & bien-seance de sa dignité. Et qu'il pourra faire porter